

ርኢሰ ኢሰያሰ አፍወርቂ፡ ምስል ዓማት አክባር ዐድ መቃበለት ወዳ



እትሊ አወላይ ክፋል መቃበለት፡ ርኢሰ ኢሰያሰ ለትቀደመ ሰላላት፡ ዓማት ወክትባካት ሰለሰ ህንዲዶ ወያኔ ወክትቶቹን ፕራቶርያ ወለትበጸሐ ተጠውራት ወናይ ሙሰተቀበል ተወጅሃቱ ለትከሰስ ተ።

ርኢሰ ኢሰያሰ እት በሊሱ፡ አግደ እሊ ሐርብ እሊ እግል ሚ አትሐዘ እበ ልብል ሰኣል ቱ ለአንበተ። ክራም ወያኔ እት መደት ስልጠቱ፡ እት አቶብዩ ደግሮ ዐባይ እንዴ አጅረ፡ ለትልህያሁ እክትምት ዐለት። እት ሰነት 2018 ፍንጌ ኤረትርያ ወክትባካት ለትበጸሐት እትቆይት

ሰላም ወምስንዮት፡ እትሊ መንጠቀት ሰእየት ሐዳስ ካልቀት ምንመ ዐለት፡ ንዛም ዋሽንግቶን ወሰብ-ሽርኩቱ ላኪን መስከብት ኢከልቀ። ምን ሐረስ እሊ ህዩ፡ እት ሐልፈ ሰለሰ ሸፍ፡ እሊ እግል ሐምረንት ለትከለቀ ክምቱ ወደሐ።

ለእብ ካጥእ ትልም ለገአ ትሉሉይ ሕሩብ እት አዳም ለአጅረየ ደግሮ ዐባይ ክምተ ለሸርሐ ርኢሰ ኢሰያሰ፡ ክእነ ትመስል ከሳር፡ እምበል መስኩልየት እግል ትሕለፍ ክም አለበ ወመሳኣለት እግል ተህሌ ክምስል ወጅበ ወደሐ። ፈሸል ናይለ

ሸፍ ሐቀለ ተአከደ፡ እትቆይት ፕራቶርያ አርወሐት ሚርሐትለ ክራም እግል ኦተክራይ እብ ሰዐይ-ሰዐይ ለመጽኢት ናይ ዋሽንግቶን ጩቅ ክም ዐለት ህዩ አፍህመ።

ኤረትርያ እሊ እትቆይት እሊ እት ፍዕል እግል ትተርጀም ገአት ምን ገብእ፡ መሸክል ክም አለበ ለሸርሐ ርኢሰ ኢሰያሰ፡ አዜመ ለትረከበት ሰላም ወቅት እንዴ ነሰኣክ እግል አፍሸሎተ ለገብእ ትልህያታት ክምስል ህለ እንዴ ሐበረ፡ ሰበት እሊ፡ ፈዓልየት ናይለ እትቆይ መቃበለት ትርድት ክም ተኣትሐዘየ ወደሐ።

እንዴ ተለ እት ርኢሰ ኢሰያሰ ለትቀደመ ሰኣል፡ ሰያሰት ወጠንያይት መንገፍ አሚሪክ ወምነ ለልትበገስ መሐምርጋይ ወመትኣታይ እግል እድንያይ ወናይ መንጠቀት ተዋልል እብ ለትወቀለት ደረጀት ተእሲር ትወዴ ለጸንሐት እት ገብእ፡ ሐቀ እሊ ክሉ ደግሮ ወፈሸል፡ እትሊ ወክድ ንነ አሚሪክ ስትትተ ህሌት ለትብለ ሐዳስ እድንያይት እስትራተጅየት መንገፍ ሚ መስኢት ገብእ እት? እብ ደረጀት ዓለም እብ ቃትን ለልትቀየድ እድንያይ ንዛም ላዴሕ ናይ ጅግረ አርደት እግል ትትሸለቀ ለህሌት መቅደረት ሚ ትመስል? ተእሲረ ህዩ እት መንጠቀትን ወኤረትርያ ሚ እግል ልግበእ ቀድሮ ለልብል ቱ።

ርኢሰ ኢሰያሰ አፍወርቂ እትሊ ሰኣል እት በልሱ፡ ለአግደ መሸክል እት አስል ወጠባይዕ ፍክር ክምቱ እት ወዴሐ፡ ለዐለ ኢናይክ አርዛቅ ሕዝባት ናይ ዐሚም ወመግህፍ ፍክር እንዴ ትሸክቱ እብ ጅግረ ሰላም ወመሳላት እግል ነቢር መዳላይ ክምስል ኢህለ፡ እሊ ሐዳስ ሰያሰትም ምን ገብእ፡ እብ ገበይ ክጠጥ ትትቀረእ እት ህሌት፡ ለዐለ ፍክር ላኪን ክም ኢትበደለ ለልክሸር ጽበጥ ክምስል ቡ ለእብ ደረጀት ዓለም ለልትርኢ መስዳራት ህዩ፡ መትጃግረት ላቶም ቅዋት እንዴ ተሐደደው፡ እግል ፈሸለ ለኦሮ እንድንያይ ቁጥብ ናይ

አሰሰት ጥሙሕ እንዴ አትሳኔክ እግል ዐወቶት እንዴኩን፡ አሳሰያይ ተቅዩር እግል አምጸኢት ክም ኢትን አፍህመ።

ለአማን እሊ ዲብ እንተ፡ እት ሙጅተመዕ ዓለም ለፈዛዐት እት ትትወቀል ትመጽእ ሰበት ህሌት፡ ለመጽእ ተቅዩር፡ ምኖም እንዴ ኢገብእ አግደ እሊ ለጋብህ ናይ ንዳል ምስንዮት አሰሰት ሌጠ ክምቱ አብረህ።

ሸዑብ ኤረትርያ እብሊ ሰያሳት እሊ እግል 80 ሰነት መስከብት ክም ኢረከበ ምናተ፡ ለሰድዩ እንዴ ኢለኣትቃምት፡ እብ ስሙድ መዳፍዐቱ ክሉ ለመሸክል እንዴ ተዐደ እትለ አዜ ለህሌት እት ደረጀት ክምስል በጽሐ ለሸርሐ ርኢሰ ኢሰያሰ፡ ሕክመት ኤረትርያ እት መደት እዳረት ትራምፕ፡ አሚሪክ እት መንጠቀትን ትተበዐ ለዐለት ሰያሰት ካጥየት ክም ኢትነፈዐ ወእግል ተአርተዐ ክምስል ወጅብ ለትሸፊሕ መዝክረት ቅድምት ክም ዐለት፡ ምናተ ለኣረትዕወ እንዴ ትብል ሰበት ኢልትሐሰብ፡ ለሐሰት ገበይ፡ እብ ደረጀት መንጠቀት ሐድ ኒል፡ ቀር-አፍራቀ ወበሐር ቀየሕ አድሕድክ እንዴ ትቀርእ ሰላምክ ወመሳልሕክ አክዶት ሌጠ ክምቱ፡ እሊ ህዩ ጅህድ ድቁብ ክም ጠልብ አፍህመ። መቃበለት ርኢሰ ኢሰያሰ አፈወርቂ እት ትመጽእ ሳምንመ እግል ትተላሌ ቱ።

33^{ይት} ሰነት ዝክረት ዐመልየት ፈንቅል እብ ነያረት ትዘክረት



ዝክረት 33ይት ሰነት ዐመልየት ፈንቅል፡ “ፈንቅል ገለድ ሕጠጥ” እት ሐንቴለ ትብል ሰቅራት፡ 11 ፈብሩዋሪ ሐቀ አድህር፡ ርኢሰ ኢሰያሰ አፈወርቂ፡ ውዘረኢ፡ ውወቁላም ቃደት ዴሽ ወጀብህት፡ መሓብር ወጠን ወዕዙማም ጋሽ ዲበ ሐድረወ መናሰበት እብ ነያረት ተዐየደት።

ሓክመት አቅሊም ቅብለት በሐር ቀየሕ አሰይደ አሰመረት አብረህ ዲበ አሰመዐተ ከሊመት፡ ዐመልየት ፈንቅል፡ ብስር

ወመዓወነት ጀብህት ሸዑብየት እብ ዓመት፡ ናይ በሐር ስትራተጅያይ ሐርብ ጀብህት ሸዑብየት ህዩ እብ ፍንቴይ እብ ፍዕል ለትረኣ ዲበ ምስትንክር ሰበትተ፡ ሸዑብ ወሕኩመት ኤረትርያ እት ክል ሰነት እብ ነያረት ክም ለዐደደ እት ተሐብር፡ ናይ ዮም ዓመት ዝክረት 33ይት ሰነት ዐመልየት ፈንቅል፡ ዲብ ሰእየት ለትህይብ መርሐለት ትትዐየድ ሰበት ህሌት፡ ፍንቴት ክም ተ ሐበረት።

አባያምን እብ ሰዳይት



መናቢቶም ዲብነ ለካስአዉ ሐርብ እግል ጋብሆት ለትርኢት ፈራሰት ወእብ ሸዑብ ለገብእ ዶር ወኣትናያት ዲብለ መጽእ ናይ ዲመ ተምሳል ዲብ ክል-መዋጥን ለሰብቀ ሐበን ሰበት ቱ፡ ዲብ አጅያል እብ ዋጅብ እግል ልትዐዴ ህዩ ዳምነት ክምተ ሸርሐት።

እሊ ሕሹም ወታሪካይ ዒድ እግል ልትክሮ ለትሳደው ጀሃት ሕክመት ወጀብህት፡ ክምስልሁመ ሸዑብ ወጅህድ ትሩድ ወዴ ለህለ ናይ ገማል ዴሽ ወአፍራድ እብ

ሰሚት እዳረት አቅሊም ቅብለት በሐር ቀየሕ ሐመደት።

መስኢለት መመቅርሓይት ልጅነት ዓያድ አሰይደ ዘይነብ ዕመር እብ ጀህተ፡ ዲብ ቀበት ዐድ ወካርጅ ለነብር ሸዑብ ኤረትርያ “አሰናይነ” ክም ትቤ፡ ታሪካይ ዒድ 33ይት ዝክረት ዐመልየት ፈንቅል፡ ሐዳስ መርሐለት፡ መስከብት፡ ሰላም፡ ውብናእ ለትአከደ ዲብ ወቅት እቱ ትትዐየድ ክም ህሌት እንዴ ሸርሐት፡ ለዒድ እግል ልትክሮ



ጅህድ ለወደው ኩሎም እብ ሰሚት መመቅርሓይት ልጅነት ዓያድለ አቅሊም ሐመደት።

ለዒድ፡ ለትረኢት ፈራሰት እበ ሸፊሕ ወናይለ መጽእ ወራታት ለለኣርኤ ዕፌ ዓዳት እቡ ናይር ዐለ።

ዒድ 33ይት ሰነት ዝክረት ፈንቅል፡ እብ ጅግራታት ርያደት፡ ዕፌ መዕረድ ሰወር፡ በራምጅ ዓዳት ፡ ዕፌ አርዛቅ ክምስልሁመ ዳሳት መጅተመዕ ውብዕድ ወራታት ጋምል ዐለ።

ር.አ.ሰ. አሰሪያሰ አፈወርቂ፡ ናይ ኬንያ ዝያረቱ እንዴ አትመመ ዐዱ አቅበለ



ር.አ.ሰ. አሰሪያሰ አፈወርቂ፡ ር.አ.ሰ. ጅምሁርየት ኬንያ ዊልያም ሩቶ እበ ወደየ እግሉ ዐዘመት ዲብ ኬንያ ናይ ክልኢ-ምዕል ዝያረቱ እንዴ አትመመ፡ እት የም 10 ፌብሩዋሪ ገሰ አስቡሕ አስመረ አተ።

ር.አ.ሰ. አሰሪያሰ እት ኬንያ እተ ጸንሐዩ ወቅት፡ ምስል ር.አ.ሰ. ዊልያም ሩቶ ሐቐለ ሀድገ፡ ዲብ ደንገበ ለፈግረ ወውዘራ እቲ ቀድሶት ካርጅ ለፈርመው ዲቡ ናይ ሕበር ሽፊሕ፡ ክልኢተን ለደውለት፡ ዲብ ሰያሰት፡ እቅትሳድ፡ እጅትማዕያይ ወናይ ዓዳት እብ ዓመት፡ ዲብ መጃል ተጃረት ወክሰኣት ማል፡ ሰያሐት፡ ሐርሰ፡ ተዕዲን፡ ተዕሊም፡ መዋሰላት ጀው፡ ለትትሐደስ ጣቀት፡ እዳረት ማይ ወናይ መንጠቀት መዓወነት ህዩ እብ ፍንቴይ እግል ልትሳደየ አተፈቀዩ።

ዲብለ ናይ ሕበር ሽፊሕ ክምለ ተሐበረ እት ፍንጌ ኤረትርየ ወኬንያ ዐቦት ተጃረት እግል ትትሻፈግ መዋዋኒን ምን ወአስክ እተ ወድወ ሰፈርያት ለጸንሐ ንዝም ሺዘት እግል ልትረፍ

ወኬንያ ዲብ ኤረትርየ ውካለት ዲፕሎማሲየት እግል ተህሌ እግሉ፡ ዲብ መፋህመት ትበጽሐ።

እምበል እሊመ ክልኢቶም ለሚርሐት ሽርከት መንጠቀት፡ ወናይ አቅሊም ሰላም እግል



አከዶት፡ አምን ወተጠውር ቃረት አፍሪቀ እብ ሕበር እግል ልሸቀው እቲ ወእት ፍንጌሆም ትሉሊት ጎማት እግል ተህሌ ወመፈውድየት ተዓውን-ሕበር እግል ቲቂም፡ ዲብለ

መናሰበት አተፈቀው።

ረአሰእ ኤረትርየ ወኬንያ፡ መዓወነት መንጠቀት እግል ትትአከድ፡ ዲብ ዕላቃት ሰያሰት ክልኢተን ድወል ህድግ ወዱ እት ህለው፡ ር.አ.ሰ. አሰሪያሰ አፍወርቂ፡ ኤረትርየ ዲብ ናይ መንጠቀት መንዘመት ኢጋድ እግል ተአቅብል ለነሰለየ መባደረት፡ ር.አ.ሰ. ዊልያም ሩቶ ሐምዴሁ ቀደመ። ክልኢቶም ረአሰ ለናይ መንጠቀት መንዘመት፡ ምራድ መንጠቀትን እግል ተአትምም እበ ተአትቅድር ገበይ እግል አጀደዶተ ምስል ኩለን ድወል አዕደእ እግል ልህደጎ አተፈቀ።

ዲብ ህድግ ወዘር ካርጅየት ኤረትርየ አሰይድ ዑሰማን ሳልሕ፡ ጌምያይ ር.አ.ሰ. አሰይድ የማኔ

ሽፊሕ ሕበር፡ ኤረትርየ ወጅምሁርየት ኬንያ

1. ር.አ.ሰ. አሰሪያሰ አፈወርቂ እብ ዐዘመት ር.አ.ሰ. ጅምሁርየት ኬንያ ዊልያም ሩቶ፡ ምን የም 8 አስክ የም 9 ፌብሩዋሪ 2023፡ ዲብ ኬንያ ዝያረት ርስምየት ወደ። ለውቁል ልኡክ ሕክመት ኤረትርየ፡ ወዘር ካርጅየት ወንምያይ ር.አ.ሰ. ለከምክም ዐለ።

2. ር.አ.ሰ. ዊልያም ሩቶ እብ እንክሩ፡ እብ ወዘረእ ካርጅየት፡ ድፋዕ፡ መዓድን፡ አርዛቅ በሐር ወመዋሰላት፡ ጌምያይ አምን ወጠን፡ ዴቅባይ ቃትን ወብዕዳም ውቁላም ሰብ ስልጠት ለተ'ለ ዐለ።

3. ር.አ.ሰ. አሰሪያሰ አፈወርቂ ወር.አ.ሰ. ዊልያም ሩቶ ዲብ የም 9 ፌብሩዋሪ 2023፡ ዲብ ናይሮቢ እብ ደረጀት ውቁላም ሚርሐት ህድግ ወደው። ለዲብ ሰንዋት ረዩም ለትበኔት ዕላቀት ታሪክ ወመዓወነት ክልኢተን ለድወል፡ ሕውትነት ወግውርነት ለትረእ ዲብ ህድግ፡ እት ናይ ሕበር መሳሌሕ ወአህምየት፡ ዲብ ናይ ክልኢ ለዱለት፡ ናይ መንጠቀት፡ ወዐለም ለክሰስ ጋራት እንዴ አተንከበው ህድግው።

4. ክልኢቶም ለሩአሰ፡ ዲብ ናይ ሰያሰት፡ እቅትሳድ፡ እጅትማዕየት ወዓዳት በህለት፡ ዲብ ሐርሰ፡ ትጃረት ወክሰኣት ረአሰ ማል፡ መዋሰላት ጥያራት፡ ተዐዲን፡ ታዕሊም፡ ጣቀት፡ እዳረት ርዝቅ ማይ፡ ሰያሐት፡ አርዛቅ በሐር ወመቅሬሕ መንጠቀት ለልትረከብ ዲቡ ለትፈናተ ከደማት ለከምክም ናይ መዓወነት ወሲቀት ስታት እግል ትትዳሌ አተፈቀው።

5. እት ፍንጌ ክልኢተን ለድወል፡ ትጃረት ወመትባዳል ተጃርብ እግል አደቃብ፡ ክልኢቶም ለሚርሐት መዋዋኒን ክልኢ ለዱለት ምን ወአስክ እተ ለወድው ሰፈርያት፡ ቀደም እለ ልትጠለብ ምናም ለዐለ ቀዋኒን ሺዘት፡ ምን የም 9 ፌብሩዋሪ እግል ዲመ እግል ልብጠር እንዴ ትፋህመው፡ ውዘረእ ሕበር ቀበት-ዐድ ድወሎም፡ እለ ስታት እለ ዲብ ፍዕል እግል ለአውዕሎ ዲብ ለአትሐዜ ቀዋኒን ወሸሩጣት እግል ልክደጥ ቀራር ሓለፈው።

6. ር.አ.ሰ. ዊልያም ሩቶ፡ ኬንያ ዲብ ኤረትርየ ናይ ዲፕሎማሲየት ወኪል እግል ለህሌ እግል ክምሰልቱ ለአትአምር እት ህለ፡ ወዘር ካርጅየት ዲያሰፖራ፡ እለ ዲብ ፍዕል እግል ልተርጅም ለልኡትሐዜ ምስዳራት እግል ልንሰእ አማውር ሀበ።

7. ውዘረእ ካርጅየት ክልኢተን ለድወል፡ እት ለትፈናተ መጃላት ለትበጸሐት እትፋቅየት መዓወነት ሕበር እት ፈረመው። እምበል እሊመ፡ እት ዲብ እትፋቅየት ለትበጸሐ ዲቡ ጋራት ህድግ እግል ትግባእ፡ ዲብ መጽእ ወቅት ቅሩብ እጅትመዕ መፈወድየት መዓወነት-ሕበር እግል ልግባእ ትፋህመው።

8. ሚርሐት ኤረትርየ ወኬንያ፡ ናይ መንጠቀት መቅሬሕ እግል አከዶት፡ ዲብ ዕላቃት እስትራተጅየት ክልኢተን ለድወል፡ እንዴ አቀረው ክም ህድግው፡ ር.አ.ሰ. አሰሪያሰ አፍወርቂ፡ ኤረትርየ ዲብ መንዘመት መንጠቀት በህለት መንዘመት ኢጋድ ለዐለት እግል ዕድውየት ክም በዲረ እግል ተአቅብል እበ ለነሰለየ ምስዳር ር.አ.ሰ. ዊልያም ሩቶ ሐምዴሁ ሸርሐ። ክልኢቶም ለረአሰእ፡ ለመንዘመት፡ መጣልብ ወትምኔት ሸዐብ ወድወል መንጠቀትን እግል አትመዋት፡ እበ ለትትቀደር ደረጀት ምን ሐዲስ እግል ትትዝም ምስል ክለን አንፋርለ መንዘመት ላትን ድወል እግል ልህደጎ አተፈቀው።

9. ክልኢቶም ለሚርሐት፡ ዲብ መንጠቀት ቀር-አፍሪቀ ሰላም፡ አምን፡ ዐቦት ወመስከብት አከዶት ወለህሌት እግል አህምየት እብ ዋዴሕ አከደው። ሰያደት ወምልክየት ድወል ዲብ አከዶት፡ ክምሰሌሁመ፡ ዲብ ቀድሶት ሰያሰት ድወል አፍሪቀ ለገብእ ላዋሽ-እደይ ዲብ ጄቀቀት እብ ሕበር እግል ልሸቀው ትፋህመው።

10. ክልኢቶም ለሚርሐት፡ ኩሉ ወራታት ለትከምክም መዓወነት እግል አደቃብ፡ ለህለ እግሎም መትዳላይ ወንየት ታመት፡ እብ ድግማን ለአክዶ እንዴ ህለው፡ ር.አ.ሰ. ጅምሁርየት ኬንያ ዊልያም ሩቶ፡ ኬንያ ዲብ ቤት ጎማት ምጅልስ አምን መንዘመት ምጅልስ ቅራን ዕድውየት እግል ትትህየበ እተ ለወዴቱ ጅህድ፡ ለዐለት ተረት ር.አ.ሰ. አሰሪያሰ አፈወርቂ ሐመደ። ምን ድወል ቃረት አፍሪቀ ወኬንያ ለልትከለቅ ተቅዩር፡ ዲብ ሸዐብ አፍሪቀ ለሰብባ መደረት ተአተላሌ እተ ለህሌት ዲቡ ወቅት፡ ተረት አፍሪቀ ዲብ ቀድሶት ዐለም እግል ትዕቤ ለገብእ መዓወናት ሕበር እግል ልትደቀብ አተፈቀው።

ናይሮቢ ጅምሁርየት ኬንያ፡ የም 9 ፌብሩዋሪ 2023
ዶኩቶር አልፍሬድ ሙቱዋ -ወዘር ካርጅየት ጅምሁርየት ኬንያ፡
ወዑሰማን ሳልሕ - ወዘር ካርጅየት ደውለት ኤረትርየ

እፈትርየዐጸዳስ

ክል አርቡዕ ለትጠ'በዕ ጀሪደት

መዳልያይ፡

መሐመድ እድሪስ

ለይአውት ወአርተገት

* ዘህረ ዐሊ

* ፋዋን አድም

ተለፎን፡ 121797/07121322

ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡ 200454

አትአመሮት፡

ተለፎን፡ 125013፡ ዕ.ሰ.ቡ፡ 1284

እምበል እሊመ ር.አ.ሰ. አሰሪያሰ አፈወርቂ ወር.አ.ሰ. ዊልያም ሩቶ፡ ምስንዮት ኤረትርየ ወኬንያ ለልኡብት ዲብ ቀስር ረአሰት ሸትል ሸትለው።

ዲብ ደንገበ ር.አ.ሰ. አሰሪያሰ ምን መዲነት ናይሮቢ ሐድ 150 ኪሎ-ምትር እንዴ ሬመት ለትትረከብ አካን ለትአሰስ መሸርዕ ጣቀት-ሸማል በጽሐ።

ር.አ.ሰ. አሰሪያሰ እትለ ናይ ኬንያ ጀውለቱ፡ እምበል ምስል ር.አ.ሰ. ሩቶ ለወደየ ህድግ፡ ምስል ብዝሓም ውዘራእመ እንዴ ትዋጀህ ህድግ።

እለ ክእን ዲብ እንቱ፡ እት የም 8 ፌብሩዋሪ ገጽ ምሴ፡ አንፋር መሕበር ጃልየት ኤረትርየ ዲብ ኬንያ እግል ር.አ.ሰ. አሰሪያሰ አፈወርቂ ወምስሉ ለሳፈረ ውቁል ልኡክ ትሳለመው።

2ኛ ክፈል

አልፍ ለሊ ወለሊ

ሸሀሪ ዛድ መዳግምለ ቅስት ምን አፍ አቡሀ ትሰምዕ ሐቀለ ጸንሐት፡ “ደሐንቱ በስ አነ እግል እትሀደዩ ቱ ወሐር አው ቶበት በልሳቱ፡ አው አነ ፍዘ ገብእኮ እንዴ ኢኮን ሐቲህ ህሌት” ቴሉ። እግለ ሕቼ ለንኢሸ ዲናር ዛድ “አምጽኡኒ ተ እቤ ምንዲ ገብእ ምጽኡኒ ተ” ቴሉም ከእግል ዐደ ትፋኔት እቤ። እብሊ አሰባብ እሊ እግል እሊ ምኮሕ ወበዐል አከይ ፍርድ እት እንቱ ለዐለ መልክ ዛልም፡ ሸሀሪ ዛድ እብ ምራደ ወሕርያን አርወሐተ እት ሸፍሩ ዓረት ቱ። ተሀዳቱመ እንዴ ኢትገብእ እት ሸረክ መካጠረት ትከፊት። እሊ ህዩ እብ ዐለ እግለ አምር ወደማነት ነፍሰ ሌጣ ቱ።

መልክ ሸሀሪ ባር ለወዘሩ እግል እሊ ወለቱ እግለ እንዴ ጸብጠ ሐቆ መጽአዩ፡ ሰኒ እብ ፈርሐት ወለወቀት ትከበተዩ። ወሐቆ አተ እት ህዋቅ እብ ብካይ ትቤ እቱ። ህቱመ እብ አሰባብ ብዋዩ ትሰክለዩ። “ለንኢሸ ሕቼ ትሰፍለልኩ። እግለ አተምጽኡኒ” ቴሉ። እግል ለአምጽኡዋተ ልኡክ ሻፍግ አሰክ ዐደ ነድኡ። ሕተ ክምሰል መጽአት ቤት አተ እብ ወብክር ሕሽመት አንሳይት ነሰአ ምኒ። ላመ ሕተ ግድም ምን አድሕድ ትዳለው ክምሰል ትቤ፡ እት ሐንቲለ ዐራቶም ግሲት እት እንተ፡ ክእኒ ቴለ እግል ሸሀሪ ዛድ፡ “ሸሀሪ ዛድ ሕቼ ትርሃን ላሊ ነ ለልትካፊሊን ድግም ዳግሚ እግል” ቴሉ።

“ሸሀሪ ዛድ እብ ጀህተ እሊ፡ ሓይሰ በዐል ዐደ ወከደን፡ መልክ ምሉክ፡ መንበ መናቢት፡ ሚልካይ ልብዬ ወበርሀት አፍያትቼ ወኑር ክልኤ ዕንቼ፡ ሲምዓይ ድሚርዬ፡ ልባሰ ላሊዬ ወሕሽመት አድሓዬ፡ ኔሰኣይ ሕሽመት አንሳይቼ፡ ዔማት ክሉ ጀዋርሕዬ ህቱ ሐቆ አጀዘ እግልዬ እግል ጠለብክም ሰምዐን ወጣዐን እዳግም እግልክም” ቴሉ። መልክ ሸሀሪ ባር እብ ጀህቱ፡ ትፈደሊ ሕናመ እግል ንሰመዐኪ ሰምዐን ወጣዐን” ቤለዩ።

አምዕል ሐቱ ምነ እቱ አከይ ፈርድ ፈርድ ለዐለ ሰኒን እግለ እት ክል ፈጅር ረቢ ለልልእኩ ለዐለ ወዘሩ ክምሰለ ክል አምዕላይ ህዩ ክምሰለ እዩዱ ወአመሉ ሐቱ በዐል አጀል እግለ እግል ለአምጽኡ እግሉ አማውሩ እንዴ ሀበዩ እግል ተንፊዙ አማውሩ ልትጸበሩ ዐለ። ላመ ልትለክክ ለዐለ ወዘረ ሰኒ ሕዩር እት እንቱ እግል ምራደ ለአትምም ልትፈረረ እግሉ ዐለ። ክለን አዋልድ አንሳት ህዩ፡ ምን ሓክም ለዛልም መልክ መፋግር ሰእናት እት እንተን ሐቱተ ከለ መክሩህ ፍርድ እት ረአሰ እግል ኢልኦጽርር እግለ እት ደዐ ጋብኣት እት እንተን ነብረ ዐለዩ መሳኪን ሕረመ ወቅት ለሀይ። ክለን ምን እሊ ፍርድ እሊ እብ ኮፎ ፈግረ ለእግለ ወድዮ ቀወዩ።

እብ ክምሰል እሊ ቴለል ሰኒን ጌሰ ወመጽኡ። ሐቱ አምዕል ህዩ ለሐዘተ ቁብታይ አሰክ ሸፍሩ ትደለለት። ላመ ወዘረ ሰኒ ሕዩር እት እንቱ ወለቱ ልብ ከፊት እግሉ። እብ ክእኒ ህዩ ትሰክለቱ።

“ይብ ሚ ቱ አክል እሊ ምንዲ ትሻቀልከ ወሀምምከ? ገጽከ ክምሰል በዲሩ ይሀለ። አባይከ ኖር ወጅሁ ትበደለ። ወመሰከብ ሀማት ወሸቀላት ገብእ ይባዩ!!” ቴሉ። ላመ ወዘረ እሊ ሰድ እሊ መሻቀላቱ ወፈርሀቱ ምነ ዛልም መልክ እት ረአሰ አዋልዱ ክምሰል ሀለ ሸርሐ እግሉ። ለዐባይ ወለቱ ሸሀሪ ዛድ ትትበሀል። ወለንኢሸ ዲናር ዛድ ትትበሀል። ሸሀሪ ዛድ ለዶር እት በጽሕ ክምሰል ዐላመ ሸክ ይዐለ እግሉ። ሸሀሪ ዛድ ላኪን እንዴ ኢትፈርህ ክምሰለ ብዕዳት ህዳይ ሸሀሪባር እብ ንዩት ክምሰል ትትከበቱ እግል አቡሀ እብ ክእኒ ደግመት እግሉ። ጠቢዐት ሸሀሪ ዛድ ምነ እትለ ጀዛይር ለሀይ ነብረ ለዐለዩ አዋልድ ፍንቲተ ለዐለት። ምኤምራይት ቅሰሰ ወቁርኣይት አክትበት ቀዳምያም አቅዋም ሰበት ዐለት እብ ዛይድ ፍክር ወሃድኡ ዐቅል ትትፈንቱ ዐለት። ዝዶድ ምን ሰነ ወግመ። እብ ምራደ ህዩ ህዳይ ምሰሉ እብ ፈርሐት ክምሰል ትከበቱ ኣሰክለቱ እግል አቡሀ። እብ ክእኒ ህዩ እግል አቡሀ ለወዘረ ደግመት እግሉ።

“ይብ አነ እትሀደዩ። አው እግለ መዋዲቱ አትሐድጉ። አውመ ፍዘ እግል ክለን አዋልድ አንሳት ሐዋቼ እጉበእ” እት ትብል ደግመት እግሉ።

አቡሃመ መባልሰ ወለቱ ክምሰል ሰምዐ፡ እብ ክእኒ ረአዩ ሸርሐ እግሉ።

“በስ ክምሰለ ትትደግሞ እንሰምዐ ቅስት ለሐረሰታይ በዐለ አድግ ወብዕራይ ኢትጅሬ እትኪ” ቤለዩ። ሸሀሪ ዛድ እብ እንትበህ ወተርኪዝ ወፈዋን ትሰምዑ ሐቀለ ጸንሐት። ሚ ጀሬት እቶም? እት ትብል ትሰክለት። “ለእቶም ጀሬት ላቱ እንቲዲ ሸረ ልክለኣኪ። እግል እድገመ እኪቱ ሰምዲ ሌጠ” ቤለዩ።


“ሰኒ ይባዩ” ለሐረሰታይ እናሰ ሰኒ ጽጉብ ወራክብቱ ለዐለ ልትበሀል። እምበሌሃመ ረቢ ሐቱ ምዕጅዘት ካፍሉ ዐለ ልትበሀል። “አይወ! ሚተ ገብእ!? ጽንሐኒ እንቲዲ እግል እድገመ እግልኪቱ። እለ ሕክመት አው ምዕጅዘት ለእቤለ ለህቱ ነብር እቱ ለዐለ ምድር ብሩር ቱ። ላመ ብዞሕ ማላቱ ወተዋብ ንዋይ ወሐርሰ እግል ልግበእ ቱ ጠብዐን። ህቱ ቅድረት ናይ አምር ህግዩ (ልቀት) ክል ሔዋን ለአምር ዐለ ልትበሀል። እላተ ህዩ ለናዩ ምዕጅዘት ፍንቲት ወለቼ።”

“ሐቱ አምዕል ምነ አምዴላተ ሰኒን ለህቶም ነብር እቱ ለዐለው።

ብዕራይ እት ሐርሰ ወዕል እንዴ ዐለ ሰኒ ድዩር ወፋትር እት እንቱ አሰክለ አድግ እሱር እት ለዐለ ሻዩት ነወል ወደ። ሐር ሰኒ እንዴ ወደ እግለ አድግ አትቃመተዩ ወአዜመ አሰክለ እት ምብለዑ ክወን ለዐለ ሸፂር እብ ድሚር ቅኒኢ ገንሐዩ። “እብ ክምሰል እሊ ህዩ ትባለሰ ምሰሉ፡ “እንተ ረቢ ሀቤከ። ክልዶል ዑሩፍ ወርዮሕ እት እንተ እርኤከ። አነ ህዩ እግል ዲመ እት ተዐብ ወጅርሰት እንብር ህሌት። ሐርሰ እውዕል ወዕርፍ አለብዬ ወራሐት። እንተ ሸቁካመ ምንዲገብእ ሐቱ ዶልተ ወበዐልከ እንዴ ትጸዕኔከ ሸፂርከ ከሬ እግልከ ወእግሉ ትገሸግሽ፡ ትውዕል ወትትመዩ” ቤለዩ።

አድግመ ህግዩሁ ሐቀለ ሰምዐ፡ እብ ክእኒ በልሰ እቱ። “ክላሰ ለእብ ትዓርፍ ወትትረዩኦ እግለ እግል አሰክለከ ወእምከረከ” ቤለዩ አድግ። “ሰኒ ወዴክ” በልሰ ብዕራይ እብ ጀህቱ።

“እሎም ትርእዮም ለህሌከ ወላድ ሚን አደሚ እግለ እት ሐንቱ ምልኮም ለትገብእ እግሉም ሓጀት ክምሰል ፈተው ወሐዘው ወድወ። እንታዲ ኢትትህመል ወኢትትጌለል እግሉም። መግዘም እት ዐረድከ ሐቆ እግል ልክረዉ



እግልከ ሐዘው፡ አክርር ምኖም። ዛበጤካመ ምንዲገብእ ኢትትሃለግ እቶም። ሐቆ ሀሬኪካመ ካልእ ዶል አክርር ምኒ። አዜመ ሀረሴከ ምንዲ ገብእ እክራረት ድገም ምኒ። ምን ብለዕ ወሰታይመ ሐድ እንዴ በልዐከ እዘም ምኒ። ሐቱ አምዕል ወሳልሰ ዮም ጽንሐ። መቅጠንከ እግል ልሸልሕ ቱ። ጭገረትካመ እግል ትትረብብ ቱ ወገሮብከ ልህመር። እብላቱ ለዕርፍ ትረክብ” ቤለዩ።

እሊ እት ልትባለሰ ለበዕሉም ሰምዶም ዐለ። ፈጅራተ ብዕራይ አሰክ ሐርሰ ክምሰል ነሰኣዉ ክምሰለ አድግ ማክሩተ ለዐለ፡ አመት ምትክራሩ ወደ። ደለ እብ ቤለዉ ሕላሌ አድወ እቶም። ወሸት እብ አቢ ወደ። አምዕል ሓሪትመ እግለ አድግ እንዴ አትበገሰው እት አካን ብዕራይ ለሐርሰ እብ ወዐለው። ማሲ ምድር አድግ ክምሰል ዔረ እብ ፈተር ወተዐብ ገጹ ትነወከ ወሐቱ እንዴ ኢበልሰ አመት ምትክራሩ ወደ። ብዕራይ እብ አድግ ሀበዩተ ፍክረት

ክምሰል ዓረፈ ሸክሩ ወሐምዴሁ እግል አድግ ቀደመ። ሳልሰ ዮሙ ክምሰል ትፈረረ አድግ ስጋዱ እብ ጽዮት ጸልዕ እንዴ ገብኣት ምኒ ዔረ። አዜመ ብዕራይ ሐምዴሁ ወሸክሩ እግል አድግ አሰመዐ። እሊ ወክድ እሊ አድግ እብ እግል ብዕራይ ሀበዩ ምክር ትዑስ እት እንቱ፡ ክእኒ ቤለዩ።

“ደሐን ሐምዴክ ውሸክርክ ሳምዐ ህሌት በስ አዜ እግልከ ሓሰበ ለሀለ በዐልን ፍክረት እግለ እግል አሰክለከ ቱ” “አህ እንሻልህ ኬር”? ትሰክለ ብዕራይ። “ኬር ኢኮን ወደሐን። ሞት ማጸኣትከ ህሌት ብዕራይ። እግል ትዓርፍ እት ትሐዜ ድራርክ እግል ጸርክ ትሐድጉ ህሌከ ብዕራይ!” ክእኒ እት ልብል ሰምዐኩሁ በዐልን” ብዕራይ ፈጅር ኢትፈረረ ምንዲ ኢገብእ ጀዛር (ሐርዳይ) እግል አብጽሐቱ” ልብል ዐለ። “እንተ ህዩ እሰቦሕ እንዴ ቀንጽከ አሰክ ሸቅልከ ገሰ። በደል ትትሐረድ ምንዲ ትሐርሰ ለሐይሰ መሰለኒ። ላለእ ትቤ ምንዲ ገብእ ፈጅር ሓሪት ቀርበትከ እግል ልምደድ ቱ ሌጣ” ቤለዩ።

ፈጅራተ ብዕራይ ኖሱ አሰክ አካን ሐርሰ ትፈረረ። በዐሉ ምሰል እሲቱ እት በዋር ምንዲ ጸንሐዩ ። ዘነበ እት ለሻልሽ እግሉ ወምን ኖሱ እግረኹ እት ወዴ አሰክ

ምውዓሉ ትሳርሐ ምኖም።

በዲር እግል መዳግሞም ቀዳም ለሳምዕ በዐሉ ወአዜ መዋዲቱ ሓር ክምሰል ረአ ሰኒ ሰበት አትፈከረዩ ምን ልቡ ትሰሐቀ። ላመ እሲተ ታጅር እናሰ፡ እግለ ሰሓቅ ብእሰ ክምሰል ሰምዐት፡ ዲብ ሚ ትሰሐቀክ? እንዴ ትቤ ጀብረቱ እግል ብእሰ።

“ህቱ እንዴ በልሰ፡ አነ እግልዬ ለትአሰሕቅ ሰምዐኩ ወርኤኮ” ምንመ ቤለዩ ምን ገብእ እግል ልሰምዑ ወልእመኑ።” ላለእ ክሉ ክሉ ሐቆ ይአሰልከኒ አነ ይሐድገከ” ቴሉ ለእሲት እግል ብእሰ። ፍንጌ እለ ወሌህ ትሐነ። እግል ኢለአሰእለ እግል ሊሙት ቱ። ህተ እግል ኢትሕደጉ ተሪፍ ምኒ አቤት። እት ረአሰ እሲቱ ለዐለ እግሉ ዛይድ ሻም ወሕሽመት እብ እኪት እግል ልትበደል ይሐዘ። እብ ሞላድመ ወለት አብሁ ሰበት ገብኣት ትሐሰበዩ። እሊ መስጢር እሊ ሐቆ ዳገማመ እግል ሊሙት ክምሰል ቱ አሰክለዩ። ሰብ ምግብ እንዴ ትላከው “ኢገበይኪ’

ወኢውዳይኪ” ቤለው። እሲትለ ጽጉብ እናሰ ላኪን ለህ እንዴ ኢተአፈርህ ወእለ እንዴ ኢትሐሸም ወኢትከጅል ሸት እብ አቢ ትቤ። ሕላሌ ለደዌት እቱ ብእሰ እግል ልሙት ማላቱ አትዋረሰ።

ግድም እግል ሞት ሴፋሁ እግል ልንሰእ እግል ልትወዴ ሸንከተ ቀዐረተ ንዋይ ቅንጽ ወደ። ምርት ጂክ ዐለ እግሉ። እሊ ዲርህ እሊ እት ሐንቲሁ ሕምሰ ደወሪህ አንሳት ዐለዩ ምሰሉ። ለክልበ እናሰ ለታጅር እንዴ ለአትቃምቱ ዐለ እግል ዲርህ፡ እብ ክእኒ ትባለሰ ምሰሉ። “እንተ እብ ፈርሐት ሂር ትብል ህሌከ ወበዐልን መይት ሀለ። ሚ ትገብእ ህሌከ በሪ ግበእ” ቤለዩ።

“ሚ ሐሰለት እግሉ? መስኪናይ አባዩቱ ሞተ” ቤለዩ ለዲርህ። ላመ ከልብ እግለ ቅስት ደገመዩ እግሉ። ለዲርህ ህዩ እብ ክእኒ በልሰ እቱ ልትበሀል። “አነ ፈድል ረቢ እለ አነ ሕምሰ (50) አንሰ ብዬ። እግል እለ አፈቱ ወእግል ሌሀ እት እትበኣሰ ክምሰል ሸንሂቼ ወምራጄ እወድዮን ህሌት። ህቱ ላኪን እሲቱ ሐቱተ ወሐቱ እብ ሐቲህ አዜ እግል መስጢር ሰሓቁ ትአምር ሞቱ ተሐዜ ለህሌት። እሊ ህዩ በዐል ፍክር ወአምር እብ ኢግብኡቱ ቱ በዐልን” በልሰ እቱ። አዜመ ለክልብ ሰኣሉ ደግመ። “ከአዜ እንተ ሚ እግል ሊዴ ሀለ እግሉ? ትብል” እግል በሊሰ ዲርህ ትጸበረ ክልብ። “አፎ አሰክ ትመይት አው አሰክ ቶበት ትብልሰ እት ቤት እንዴ አተዩ ኢዛብጠ” ቤለዩ።

እግል መባልሰ ዲርህ ወክልብ ሰምዕ ለጸንሐ ታጅር እናሰ እንዴ አቅበለ እት ቀበት ቤት እንዴ አተ እግል እሲት ትላከዩ። እግለ ባበተ ቤት እንዴ ጋፈለ እተ። እብ ሞረ አሰክ እት ቀፈላት ትትካሬ ፈሊል ወደዩ። እሲት አርወሐተ ክምሰል አተቅረበት። ሐሰብ ወክትል እት ትብል እት እደይ ወሸነኒ እብ ሰዕሞታት ወድቀት እግሉ። እት ደንገበ ህዩ ቶበት ወዴት። እብለ ህዩ ለእግል ሞቱ ልትጸበር ለዐለው አዳም እብ ፈርሐት ትበሸረው። ላመ ምን ሞት አድሐነቱ ፍክረት ናይ ዲርህተ። አዜመ ለእተ ጀሬት እግል ኢትትጅሬ እትኪ ፈርህኮ” ቤለዩ።

(እግል እለ ቅስት እለ ለትመሰል ላኪን እት ዐድነ እት ቆምዮት ትግርኛ እብ ክእኒ ትትዳገም ትትሰመዕ፡ ለክልብ ክምሰለ ትበሀል አክላብ ህቶም መጽእዉ ወምሰሉም ልትባልሰ። ሐሬ ህዩ ለእግሉ ልትሰኣሉ ለዐለው አክላብ ሰበት ገብኣው። “እሲት እግል ኢልሕደግ ምድር ለሐድጎ” እት ልብሎ ክምሰል ትባለሰው ምሰሉ፡ ለእናሰ እለ ክምሰል ሰምዐ እግለ እሲቱ ሐድገዩ ልትበሀል። ምን እለ አምዕል እለ አንበተ ሕድጎ እንዴ ልትበሀል ልትዳገም። ቀደሚህ ላኪን ወድ ሚን አድም ለሐድግ ይዐለ ልትበሀል።)

ትተላሌ. . .

1^ይ ክፈል

ርእሰ ኢሰያስ አፈወርቅ፡ ዲብ ቀድሶት ቀበት ዐድ፡ መንጠቀት፤ ወዐለም ለረከዘት ምን መዲነት ባጽዕ እብ ዓማታት አክባር ዐድ ሙባሸር ለተሐላሊፊት መቃበለት፡ እግል ዮም ሰልፋይ ክፋል እግል ንርኤ፡ ከአሰልፍ ዲብለ አወላይ ሰኣል እግል ንትዐዲ፡-

ሰኣል፡ ሓይሰ ርኢሳይ በክት ሰበት ሀብከ እንዴ ነሐምደክ እሰልፍ እበ ምን ቅሩብ ለከሰን ተዋልል እለ መንጠቀት፤ እግል ነክንብት። ሓድር ተዋልል አቶባዩ እብ ፍንቱይ ወመንጠቀት፤ እብ ዓመት እግል፤ ምን ቅሩብ ተምትመ። ደግሞ ዲብ ወፊሕ 1 እተ ለገብአት መቃበለት፤ ህንዲዶ ወያኔ ከም የአክተሙ፤ ከምሰሌሁመ ክራም ወያኔ እግል ለአድሕና እብ መናቢቱ ለገብእ ጅህድ ለከሰን ተውዲሕ ሃይብ ዐልኩ። ከምሰለ ቴልካህ ህዬ፡ ወያኔ ከመ ለሐልፈየ ክልኤ ጀርቤ፡ ዲብ ወቅት ከረም ለሐልፈት ሰነት ሳልሳይት ጀርቤ ወደ። ዲብ ደንጎበ ህዬ እንዴ ኢፈቱ እትፋቅየት ከሪ ሰላሕ እግል ልፈርም ትቀሰበት። ከእትሊ ተዋልል እለ ለአብጸሐ ናይ ሲዮሰት ወሰከርየት አሰብብ እብ ዋዲሕ ሚ ቱሪ ለመጽእ መርቦዩ ህዬ ሚ እግል ልግበእ ቀድሮ፤

በሊሴ፡ “ዲብ አንቦቶትላ ቅዱም ለሀላ ሰኣል፡ ዲብ ተፍኪር ክል አዳም ለመጽእ፡ እለ ሐርብ እለ እግልሚ አትሐዘ ለልብል ቱ። የምክን እለ ናይ ደንጎበ እግል ትትብህል ለትቀድር ሳልሳይት ጀርቤ ህንዲዶ ቁማር፡ ምን አየ ትበገስ እንዴ ትቤ ዲብ ቀበት ወቅት ሐጪር በደል ትጌምሙ፡ እንዴ አቀፊክ ወሐር እንዴ አቅበለክ እግል ትርእዩ ብኩ። ክልኤ ጀርቤታትዲ ገብአየ። ለሳልሳይት ጀርቤ ህዬ እግልሚ አትሐዘት ወዲብ ሚ ለትመሰል ሓለት ተ ለመጽእት እግል ቱበል፡ ክልዶል እግል ሚቱ ለሐርብ ተሐዘ። እግል ኒበል ብኩ። ሰልፍ ለሐርብ እንዴ ኢልትአንበት ሰላም መጸአት እተ ለትብህለ ዲብ መደት፡ ለትልህየ ቁማር ከም ትከለሰት ቱ ለሰላም መጽአት። ምናተ ክራም ወያኔ እንዴ ኢገብእ፡ አነ ክራም ዋሽንግንቶን ቱ ለእብሉ። እግል ልሰከቦ ወልቅሰኖ ኢቀድረው። እት ፍንጌ ኤረትርየ ወኢትዮጵየ ለትመጽእ ሰላም እብ ፍንቱይ እግሎም ሕማም ረኒሰ ተ። ለሰኣል እበየ ወእብ ከአፎ ሰላም መጽአት እንዴ ኢገብእ፡ ለመጸአ ተጠውር ሰላም ለክልቀዩ ዲቦም መትብጭባጭ ወዐሎባዋ ዐቅል አክል ሕድ ልትረኤ ዐለ። እብ ረአየም ህዬ እለ ለትረከበት ሰላም እግል ተሐምርገ ብኩ። መትሻቀዩ ናይለ ሐምረጎት ሰላም ህዬ ወያኔ ተ። 30 ሰነት እግል ዐውቶት ሃዳፎም ለሸቁቱ ሸቀል፡ እግል ኢትዮጵየ ዲብ ሚ ለመሰል ረወክ ብቅት ሻመ ከም ሀላ እግል ንፍህም ሰዱድ ኢኮን። እግልሚ እብ ዐመል ልትረኤ ሰበት ሀላ። ክራም ወያኔ ከም ገብር አው መትሻቀዩ ለትትቀደሩ ሐቆ ወደ፡ ከም ዋጅብ እንዴ አክተመ ቅፊቱ እንዴ ረፍዐ ዲብ ግድፍ ግማመት እግል ልትለከፍ ዐለት እግሉ።

መቃበለት ርኢሰ ኢሰያስ አፈወርቂ

ለእግሉ ለለአገብሮ ላኪን ኢሰክበው ወኢቀሰነው። ለትልህየ ቁማር ትከለሰት እተ ለትብህለት ዲብ መደት፡ አዜመ ምን ሐዲስ እብ ከአፎ ከም ለአነቡተ ለፈብረከው ከይናት፡ ፍገሪቱ ዲብ አወላይት ጀርቤ ለትረኤት ተ። ለጋሪት ክራም ወያኔ እግል ሊዴ ሐለት ወመቅደረት ቡ ሚ አለቡ እንዴ ኢትገብእ፡ ለልትሐበክ ለዐለ ከይናት እግል፤ ለአትፈክረነ ወሻቅለነ ዐለ። እግልሚ፡ እሰልፍ እተ መናሰበት ፈቴሕ ሕዱድ እምሐጀር-ሐመራ፡ እግል ሚርሓይ ክራም ወያኔ እግል እርከቡ ንዮት የዐለት እግልዬ። ዲብ ደንጎበ ላኪን፡ ሰር ደቂቀት ትግባእ ወክልኤ ደቂቀት እንዴ ረከብክወ አፎ ይእትሰኣሉ ለልብል ረኣይ ምስለ መናሰበት ፈቴሕ ሕዱድ እምሐጀር ሰበት መጽኤ፡ እግልሚቱ ለእግል ሐርብ ትትዳለው ህሌኩም፤ አየ እግል ትብጸሐ ምን ሐዜኩምቱ ዲብ ሐርብ ተአቱ ለህሌኩም ወእግልሚ ሀደፍ፤ እቤሉ። ኢትገብእ ለልብል በሊስ ሀቤኒ። ኢገብእ ኢኮን ለሰኣል እግልሚ ሀደፍ እግል ሐርብ ትትዳለው ህሌኩም፤ በሊስ ኢትረከበ። ሐቆሁ ለክፍ ሚሳይላት ለብዲቡ

እለ ለወያኔ ለለአሸቁ ጀሃት፡ ወያኔ ክምሰለ ሸቅል ዐቢ ለሸቁ ወመቅደረት ለቦም መሰለዮም። አስመረ እብ ሚሳይላት ምንዲ ትዘብጥ ተቅዩር ዐቢ እግል ለአምጽእ ቀድር ለልብል ፈሀም ዐለ እግሎም። ዲብ አስመረ ለሀላ መካትብ ሰፋራት ለሰዋሪክ ዲብ አስመረ ከም ትከረ፡ እግል አትራዘቅት ወአትዓባይ ጥሩምባት ደዓያት ለዘብጥ መሰሎም ዐለ። እለ ህዬ እግላ ዲብ ቀበት ዐድ ለሀላ ኢለአትፈክሩ ገብእ። እግላ ምን በረ ለአትቅብል ለሀላ ላኪን ሚ ገብእ ከም ሀላ አጊድ እግል ልፍሀም ኢቀድር። ሕነ ላኪን ብዘሕ ለለአትፈክረነ ጋር አውመ ፍዕል የዐለ። ቁማርቱ ወቁማር እግል ልትከለስ ቱ። ለከሰረ መተልህያይ ቁማር ማሉ ከም ትበልዐ ምኑ እንዴ ትሰለፈ ልተልሄ። እለመ ከም ሐግለ ምን ሐዲስ ልትሰለፍ ወእተ ብቅት ቁማር ለአተላሴ። ዲብ ካርጅ ህዬ ለለአሸቁ ሴድየት ዐለው እግሎም። ህቶም ለበለውክ ትብል ወውደየ ለበለውክ ትውዴ። ለአወላይት ጀርቤ ትከለሰት። እግሎም ላኪን ኢትከለሰት እግል ተአተላላቤ በ። ለአወላይት ጀርቤ እብ

ጀርቤታት፡ ለሰልፋይ ሰበት ኢተዐውተ ዲብ ካልኣይ ትትዐዲ። ለመደት ለሀላ ለዐለ ተዋልል ዮም ሐር እንዴ አቅበልክ ልትረኤ እንዴ ሀላ፡ ቀሺም ሌጣቱለ ትልህየ ምድግብ ክልሰት እንዴ እንተ ለልተልሄ። ምናተ ህቶም ወመናቢቶም በክት ርኩብ ሰበት ሀላ እበ እለ ቦም ሐለት ወበሰር አሰክ ግብለት እግል ልትበገሶ ሐረው። ምን ሽዐብ ለተአከበት ወእንዴ ትቀሰበት ለትጀነደት ቅውት ሸባባት ዶል ትርእዩ፡ እግላ ለዐለ መቃመራት ብዴ ወአብዴ እብ ዕጹፍ አትሻከተየ ወአትናየተየ። ሰልሖም እግል ነክክርዮም ወነክርከዮም እንቀድር፡ ሐለት ካፍየት ብኩ፡ እብኩ ኢትትሸከኩ፡ እንዴ ቤለው ህቶም ወመናቢቶም በኖም እንዴ ገመው አተው ዲቤ። ለናይ ደንጎበ ፍገሪቱ ላኪን ምን በዲረ እምርት ዐለት። ዲብ ለኢተአምሩ ምድር ፋዬሕ አሰክ አዲስ አበባ እንዴ አተው ለተዋልል ዲብ መሰለሐቶም እግል ልበዱሉ ወለብጽሕት ለዐለት ሰላም እግል ለሐምርጎ ሐሲብ መዕየን ሌጣ ቱ። ለበክት እንዴ ትረከበ ለካልኣይት ጀርቤ ተአንበተ፡ ምናተ እለ ጀርቤ

እንዴ ትርኤ ህዬ ትትሰሐቅ። ወለ ለተዐየን አዳም አክል እለ ከለጥ ክልጥ፤ ለለአተብል ቱ። ለገብአት ምን ትገብእ፡ ለክልኣት አብካት አደቦትለ ህንዲዶ ጀኣረት ሐልፈው። ለሳልሳይ አዜ መጽእ ሀላ ላኪን እለ በክት እትሊ ክሉ-ክሉ እግል ልሕለፈነ አለቡ ትብህለ። ለመትዳላይ ወረበርብ ደዓያት ለአተላላ ወለ ነጋገር ሐርብ ልትሀናደድ እንዴ ዐለ፡ ሳልሳይ ወናይ ደንጎባ ወመሲርነ ለቀርር ሐርብ! ትብህለ ወእግሉ ለገብእ መትጠባጣብ እብ ክሉ ገብእ እለ። እለ ከይናት ወመትዳላይ እግል ሕሩባት ወዘርእ ነዐር፡ እብ ሐለት ወመቅደረት ወያኔ እንዴ ኢገብእ እበ እግሉ ለለአሸቁ ክራም ዋሽንተን ለተሐዘክ ቱ። እግልሚ ምን ልትብህል ህዬ፡ ለእሰልፍ ለትከለቀት ሰላም ሰበት ኢልትከቦተ ወኢተአከሰበም፡ እግል እንዴ ፈንጠርክ ወሐምረግክ፡ እበ ለትረከቡ በክት እንዴ ትነፈሪክ እግል ትፈንጥር ብኩ። እትሊ ሸቅል እለ ህዬ ለድማነይት እዴህም ክራም ወያኔ ተ። ክራም ወያኔ ህዬ ሽዐብ ትግራይ እንዴ ቀሸሸ፡ እንዴ ቀሰብ ወለአትፋርህ ዲብ ለትፈናተ እብ አማን ወሐቂቀት ለኢልትበጸሕ ሕልም እንዴ ለህንድሴ፡ እግል ለአሸቀዩ ለሀላ መንባሁ እብ ከአፎ ከድም ወገብር እግሉ፡ ወያኔ ለትከፊዕ ዐለት አለቡ። ለፈብሩኩ ወለአትበገሱ ለዐለው ላኪን ብዕዳም ቶም።

እምበለ ሸንክት ቅብለት ወግብለት እንዴ ትበገስክ ለገብእ ሐርብ፡ ዲብ ምድር ሶዳን ለገብእ መትዳላይ ሰኒ ዐቢቱ። እብ ሸንክት ምውዳቅ ጸሓይ ምስል ሶዳን ለተአትራክበነ ገበይ እግል ትትፈታሕ በ፡ ለትብል እስትራተጅየት ወተፍኪር ሰበት ዐለ እግሎም፡ ምን መዐስከራት ላጅኢን አዳም አክብ፡ ዲብ ዲሽ ሕፍዝ ሰላም ዳርፎር ጋይሰት ለዐለት ቅውት ትከምከመትከ ምን ሐዲስ ዲሽ ሐዲስ ነዘመው። እለ እብ ሸንክት ምውዳቅ ጸሓይ ገበይ እግል ትትፈታሕ ለገብእ መትዳላይ ቱ። እብ ምፍጋር ጸሓይመ ከምሰሌሁ፡ ጅቡቲ ተአትዳሌ ወዲሽ ተሐርክ፡ ወዲብ ሕዱድ ለሀላ ክላፋት ነኣይሽ ተአትሳውር ወተዓቤ ከክርቢታይ ትሸምት ዲቡ፡ እላመ ጀብህት ሐቱተ። ሰበት እለ ለሐርብ ዲብ ሸንክት ቅብለት ወግብለት ለረከዘ ሌጠ እንዴ ኢገብእ፡ እግል ፈቴሕ ገበይ እብ ምውዳቅ ጸሓይ ወአትቃርሖት ወአትፋይሖት፡ ነዐር እብ እንክር ምፍጋር ጸሓይ እግል አደቀቦት ዝያድ 6 ወሬሕ ለነሰኣ ለከፌ መትዳላይ ገብእ እግሉ። እግላ ናይ ሐርብ ሐለት እግል ለአደቅብ ቀድር ለትብህለ ለትፈናተ መትሻቀዩ ወሰለሕ ላሊ-ላሊ እብ ጥያራት ለትደኸክ ዛህር ወስቱር መክለሲ አለቡ። ሳልሳይ በክት ትመጠጡ ደሐንቱ ለፍልም ልምጸእ ሌጠ ሐቆህ ከአፎ ከምቱ እንርእዩ እንቤ። ለወቅት ሰበት ተመ ህዬ ሐርብ ሳልሳይ ወናይ ደንጎበ በክት ተአንበተ።

ዲብ ገጽ 7 ልተላሌ..



ህንዶዶ መጽኤ፡ ዲብ ኤረትርየ 72 ሃዳፍ እንዴ አሌሊክ እግል ትዝበጥ ወጠኖት፡ እለ ለመሰል ህንዲዶ ሀላ ላኪን ኢተሐበረ ወኢተአመረ። እት ወቅቱ ወሳዐቱ ላኪን እግል ልትሐበር ቡ። እለ ክሉ መትዳላይ ናይለ መደትለ ሰልፍ ሕነ እንርእዩ እንዴ ህሌኑ ናይ ለከሰረ ወለ ጠፈሽ ታጅር መቃመረት ቱ እግል ቱበል ትቀድር። ለልትቀደር መትዳላይ ወደው እግሉ።

ለመደት ለሀ ለዐለት ትምኔቶም ወተፍኪርም ለርክብት ለዐለት ሰላም ወመፋህመት እንዴ ሐምረግክ ወፈንጠርክ አብካት ሐዲስ ከሊቅ ቱ። ለዶል ለሀ ለዐለ ሀደፎም ከምሰለ ዲመ ለወድወ ህጃማት፡ ሐርብ ወወራር፡ መቃመራት ወስሐት ሌጣ ቱ። ለናይ ክራም ዋሽንተን ተፍኪር ካጢ እግላ ሸንህት ክራም ወያኔ አትሻከተየ ወዳረከዩ። ምን ሐርስ

ከአፎ ትበገሰት ወእብ ከአፎ ትከለሰት ብዘሕ እግል ንትሃጌ እበ እንቀድር ላኪን። ዲብ ለሐጭረ ወቅት ሐል እግል ልርከብ ለወጅቡ እንዴ እንቱ ሐል ኢረክበ ወመክርዲ። ከለ ጀርቤለ ሰልፍ ለክፍ ሰዋሪክ ልግበእ ወወዲ ህጃማት እንዴ ኢገብእ፡ ምንኬኑ እግል ሊጊስ ዐለ እግሉ። ለተአድብ ጽፍዐት መራር እግል ልርከቦ ዐለት እግሎም። ምናተ ለበክት ተዐንቀፈ። እብለ ወእብ ሉህ እንዴ ባሰረው ምን ብቅት አድሐነዎም። ሐቆ እለ ለሕርያን ለካልኣይ አሰክ ኮምቦልቻ ወወሎ እንዴ ትወለብክ ሰገም አሰክ አቲ አዲስ አበባ ቱ ትብህለ። እግሉ ለለአትሐዝዮም ተማሲል ከትበው ወአትዳለው እግሉ ከበክት ካልኣይ መጽኤ ትብህለ። እብ አማንመ ካልኣይ በክት ቱ። ዲብ ምድር ፋዬሕ ወዲብ ለኢትፈግር ምኑ ተማሰ ብቅት እንዴ አቱክ ለትወድዩ


እላመ ከምሰለ ሰልፋይት ጀርቢህም ተዐንቀፈት። እግልሚ እበ ናይ ክራም ዋሽንግንተን መቃመረት፡ ለበረብረ ለልትብህል ሀገጊት ብዕድቱ ላኪን፡ ለሐርብ እግል ልብጠርቡ ወህጃም መግክሰ ዲብ ምድር ትግራይ እግል ልግበእ አለቡ ትብህለ። እብሊ አሰባብ እለ ለካልኣይ በክትመ ተዐንቀፈ ከሐልፈ እንቤ። ምናተ በዐል አመል አመሉ ሰበት ኢለሐድግ ለሳልሳይት ጀርቤመ እግል ትምጸእ ሰበት ተ እብ ሱብር ንትጸበረ እንቤ።

መትዳላይ መጽ፡ እብ ሐለት፡ እብ ቅሸሽ፡ ወእብ አትፋርሆት ለተአከበት ቅውት አዳም ቅያሰ እለቱ እግል ትትብህል ኢትትቀደር። እለ ጀርቤ እለ ከምሰለ ደርጊ ልብሉ ለዐለ ናይ ደንጎበ ሐርብቱ ትብህለት። ለገብእ ደዓያት ሌጠ እንዴ ኢገብእ፡ ለገብእ መትዳላይ ለለአትዐጅብ ቱ። ከም መትቅብላይ



4^ይ ክፋል

ሕመዳይ፡ ጀላብ ተዕሊም ወንድል



እድሪስ ሕመዳይ ዲብ ጃምቦት በቅዳድ 1969

ከረ እድሪስ ሕመዳይ እግል ሰፋረት አቶብዩ አንደደው። እሊ ክሉ እንዴ አንደደው ዲብ ለአቀብሎ ከረ ረመዳን፡ ዕመሮ ወዕብደልከሪም ወክልኦት ብዕዳም ክሉ ክሉም ሐምስ ነፈር፡ ፖሊስ እንዴ ዐረምም ጸብጠምም ከአስክ ሰጅን ገለለምም። ለብዕዳም ላኪን እንዴ ትፈንጠረው አስክ አብያቶም አቅበለው።

እትሊ ወክድ እሊ ሰፋረት አቶብዩ ዲብ መስር ምስል ክሉ መምተላካተ እብሊ ዲብ መስር ደርሶ ለዐለው ኤረትርዩን ጠለበት ክምስል ነደት ወለሐምስ ምነ ጠለበት ክምስል ተአሰረው፡ ክሉም ለደረሰ መልሂቶም እግል ልፍገሮ ዲብ ናዲ አፍሪቅዩ እንዴ ገሰው አሴራር ሰላም ኒዴ ወመቃወሙትን ንሽረሕ እንዴ ቤለው፡ አዜመ አስክ ናዲ ዘማልክ ትወጀህው፡ ወለመሚርሐቶም ክምስል ተአሰረው አዜመ ምሮ ኢብራሂም ዐማር ለልትብህል ሚርሓይ ሐዲስ እንዴ ወደው አስክለ አካን ገሰው። ወጠለም እግል ሰብ ሰልጠት መስር ቀደመው ወበርቅዩት ዲብ ጀማል ዐብደናስር ነድአው። ወእብሊ ጀማል ዐብደናስ ዲብ ናዲ አፍሪቅ ለእሱራም ለህለው ጠለበት እግል ልፍገሮ ክምቶም ሐበረዮም ወለእድራብ እብላሁ እብ ዐውቲ ጠለበት ኤረትርዩ ተመ።

ክመ ልዘከር ሓምድ እድሪስ ዐዋቲ ንዳል ኩፈሕ መሰለሕ አሰሰ ለልብል ከበር ዲብ መስር ወእብ ፍንቱይ ዲብሊ ዲብ ለዐለው ጠለበት ክምስል ትንሸረ፡ ቀደም አንደደት ሰፋረት አቶብዩ ዲብ መስር ሐቆ እሊ ገሌ ምነ ጠለበት፡ ሕኔት ዲብ መስር ልትገሰው ኤረትርዩ እንዴ መጽአው ሰሮም ዱቅሪ ዲብ ኩፈሕ መሰለሕ እግል ልሻርኮ ወሰሮምመ



ምናድል መሐመድዐሊ ዕመሩ

ዲብ ከርሰለ አቶብዩ ለዐለት እቱ መዳይን ዐባዩ ናይ ኤረትርዩ እንዴ አተው ንዳሎም እብ ሲያሰት ወሰለሕ እግል ለአተላላ ትከማከመው። እግል መሰል፡ ክልኦት ምነ ዲብ መስር ለዐለው ጠለበት ኢብራሂም እድሪስ (ብሌናይ) ወሰዲድ ሕሴን አስክ ሱዳን ሳፈረው። ሰዲድ ሕሴን አስመረ መጽአ ወዲብ ከርስ አስመረ ተርቲብ ወዴ ዐለ። ኢብራሂም እድሪስ ህዩ ዲብ ሱዳን ልትሐረክ ወለኦትመቃሬሕ ወእትሳላት ወዴ ዐለ።

ክመ ዲብ ሐልፈ ክፋል ለረኤናሁ ለዲብ መስር ዐለው ጠለበት፡ እግል ዲብ መስር ለዐለት ሰፋረት አቶብዩ ለአንደደው ጠለበት፡ እግል እብ ሰብብለ ነድ እሱራም ለዐለው መልህያምም ዲብ ዘማልክ ናዲ አፍሪቅዩ እንዴ ገሰው እድራብ ክምስል ወደው ወዲብ ጀማል ዐብደናስር በርቅዩት ክምስል ነድአው ለጀማዐቶም ተዐተቀው፡ ላኪን ኤረትርዩን ጠለበት እብሊ ኢትገሰው፡ ንዳሎም እብ ሲያሰት ዲብ መስር ለአተላላ ዐለው።

ሕመዳይ ዲብ ናዲ ጠለበት ዕዱ ወመስኦል መክተብ እንዴ ገብእ ክሉ ሀሙ ወቀልቡ ዲብሊ ንዳል ዐለ። ዲብ እሊ ናዲ እሊ ህዩ ለጠለበት አክትቦት ወእብ ፍንቱይ ኤረትርዩ ወአቶብዩ ለከሰስ ቀርኦ ወጀሪደት ለአፈግሮ ወቅድየት ኤረትርዩ ክሉ ክምስል ለአምረ ወዱ ለዐለው እቱ ወክድ ቱ። እግል ክሉም ዲብ ናዲ ለዐለው ለከምክም ህዩ ሸሂድ ሓምድ እድሪስ ልትብህል። ሐቆ ሕርየት ዲብ አስመረ ዲብ መሕከመት ሸቄ ዐለ።

እትሊ ወክድ እሊ ሰውረት ኤረትርዩ እንብትት ሰበት ዐለት፡ ላመ ዲብ ካርጅ ለዐለው ሸባብ ኤረትርዩ ወእብ ፍንቱይ ዲብ አልቃህሪ ለዐለው ጠለበት ምስል ሰውራቶም እብ ለፈትፈናተ አግቡይ ልትዓወኖ ወልሳደው ዐለው። እትሊ ወክድ እሊ ዲብ አልጀዛር ሰውረት ዐለት ወእብ ሰበት እሊ ሰውረት እላመ ብዙሕ ታብዖ ወተእዩዶም ድድ እስትዕማር ፈረንሳ ሸርሐ ዐለው። ካልኦይትመ፡ ሰውረት የመን ዐለት ወእብሊ ለኤረትርዩን ጠለበት ምስል ዲብ ለዐለው ጠለበት አልጀዛር ወየመን ልትዋጀሆ ወዕላቀት እሱሳም ዐለው። እት ክእነ ዲብ እንቶም ዲብ ሰነት 1963 ለቅያደት መጅመቦት ምን ጠለበት ዲብ ሱርየ እንዴ ገሰው ለልደረሶ ነሐዜ ህሌነ ቤለው። እትሊ ወክድ እሊ ረመዳን፡ ዕመሮ ወዕብደል ከሪም ምስል ብዕዳም ዐስር ነፈር ገብኦ ተድራብ ዐስከሪ እግል ልንሰኦ አስክ ሱርየ ገሰው። ወእብሊ ሸዑር ናይሊ ጠለበት ሰኒ ውቁል ዐለ። ሰሮም እንዴ ግሰነ እግል ንትሓረብ ልብል ወሰርመ ድራሰትነ እንዴ አትመምነ ሰውረትነ እግል ንክደም ወዲብ እሊ ጎርነ እግል ጀላብ ሕርየትነ እግል ንክደም ለለልብል ቱ ለዐለ።

እብሊ ለዲብ መስር ዐለው ጠለበት ልሰዕ እምበለ እብ መናሽር ሰውረት ኤረትርዩ እግል ለትኦምሮ ወድዉ ለዐለው አትፋዝዖት ልሰዕ ድድለ ዲብ መስር ለዐለው ዲብሎማሰዩን አቶብዩ ንዳሎም ሲያሲ ለአተላላ ዐለው። እብሊ ህዩ ሕመዳይ አዜመ ዲብ ሰነት 1966 እግል ካልኦይ ወክድ ምሮት ምነ ሰፋረት አቶብዩ ዲብ መስር ለአንደደው ዐለ። እትሊ ወክድ እሊ ሕመዳይ ሸሃደት ካልኦይ ደረጀት እትመም ዐለ። ወዲብ ጃምቦት አልቃህሪ ቃኑን እግል ልድረስ ስጁል ዐለ።

እትሊ ወክድ እሊ መስርዩን እግል ዲብ ለዐለው ኤረትርዩን ጠለበት ተድራብ ዐስከሪ እግል ነበከኩም መጅመቦት ነሐዜ ምንኩም ህሌነ ቤለምም። ዲብ እሊ ወክድ እሊ ርኢስ ተንዝም ጀብህት ተሕረር ኤረትርዩ እድሪስ መሐመድ ኣድም ዐለ። እድሪስ እጅትመዕ ምስል ጠለበት እንዴ ወደ፡ “ዲብ አልቃህሪ ለህሌኩም ተድራብ ዐስከሪ ለነሰኦ ጠለበት ነሐዜ ህሌነ” ቤለምም። ሕመዳይ እሊ ከበር እሊ ክምስል ሰምዐ ዲብ እግል ልደረሶ ለትብህለው ጠለበት ትሰጀለ። ግራሁመ እብ ምርምር ዲብ ልሰጀሎ ሐድ 30 ነፈር በጽሐው። ለወክድ ተድራብ ዐስከሪ እንዴ ኢለኦነቡቶ፡ ንጉስ ህይለስላሴ እብ ዝያረት ዲብ መስር መጽእ። እትሊ ወክድ እሊ መስርዩን እግል ኤረትርዩን መልክ ህይለስላሴ መጽኢነ ሰበት ህለ ሸውየ ሰብር ደው።




ምናድል ረመዳን መሐመድኑር

ሕነ ወህቶም እግል ንትፋህምቱ ለልብል ቱለል ሐዲስ ትከለቀ። ክምስል ክልነ ነኦምሮ ዲብ መስር ርኢስ ናይ ሐቱ ደውለት መጽኦ ምን ገብኦ። እግል ዲብ ለህለው አፍሪቅዩን ጠለበት እግል እስትቅባል ዲብ መጣር ለአኩቦም።

እትሊ ወክድ ኤረትርዩን ጠለበት ያፍተት እግል ልክተሶ አተፈቀው። ለያፍተት እብ ትግርኛ “ህይለስላሴ ልውደቅ” ለልብል ጽበጥ ዐለ እት። ወእብሊ መንዴረት ኤረትርዩ ወእሊ እብ ክቱብ ለዐለ ጠለበ እንዴ ረፍዐው፡ መጣር እግል ሊጊሶ ወሰርም ዲብ ሰፋረት አቶብዩ እንዴ ገሰው ክመ ቀዳሚት እሊ እግል ለአንድዶ ትዋፈቀው። ወእብሊ ሕመዳይ ምነ መጅመቦት ለሰፋረት እግል ተኦንድድ ለትየመመው ገብኦ። ሕመዳይ፡ መሐመድሰዲድ አንጠጠ፡ ያሲን ፍካክ፡ ኢብራሂም መሕሙድ፡ ወብዕዳም እንዴ ገብኦው ዲብ ግዛዘት ለምበ እንዴ ወደው ለሰፋረት እግል ለአንድዶ ዲብ ሰፋረት ክምስል ገሰው ዲብ ባብ ምሮት ባልዕ ሳቲ ምርድየት እብ ባሩደቱ ልትከቡቶም። ወእባሆም እግል ምርድየት እበ ባሩደቱ ጸብጠው ወትገሴ እንዴ ቤለው ዲብ ሳፈረት ሐልፈው እግል ለአንዱድ።

እሎም ጠለበት እሎም ሰሮም ተድራብ ዐስከሪ ናስኦ ሰበት ዐለ እብ ስለሕመ ምንገብኦ ምሽክለት ይዐለት እሎም፡ እግልሚ መስርዩን ደሩቦም ዐለው። እብሊ ህዩ ለሰፋረት እግል ካልኦይ ዶል አንደደው። እትሊ ወክድ እሊ ፖሊስ መስር መጽአው ወገሌ ምኖም ጸብጠው እሊ ህዩ ምነ ሰፋረት ለአንደደው ሐድ 15 ለገብኦ ጸብጦ ዲብ ህለው፡ እግል ዲብ መጣር ለዐለው ሐድ 30 ለገብኦ ጸብጠው ምኖም። ወላመ መስርዩን እበ ውዲትነ ሰኒ ትክደው፡ እግልሚ “እንቱም እግል ጋሻይነ ክእነ እግል ቲደው ይዐለ እግልኩም፡ እኩይ ወዴኩም” ቤለምም።

ህይለስላሴ እሊ ክምስል ረኦ፡ እት ምስል ዐብደናስር ለወደዩ ህድግ፡ አቶብዩ ምነ እብ ሰበት መስር ለዐለ እግል መጣጥር እግል ትቀይር ለልብል ዐለ። እግልሚ እት ወክድ ለህይ ድወል ምውዳቅ ጸሓይ ከናል ሰዌጽ ከናል ደውልየ እግል ልግበኦ ለልብል ዐለ። አቶብያመ ረኦይ ድወል ቀርብ ተኦይድ ዐለት። ምስሉመ ዲብ ነህር ኒል፡ ቤን አቶብዩ ወመስር አከይመቅርሕ ክሉቅ ዐለ። እሊ ዲብ ሰነት 1966 ቱ ለዐለ።



ምናድል እድሪስ ሕመዳይ 2023 አስመረ

አቅረበው።

እሊ ወክድ እሊ ጀማል ዐብደናስርመ በሊሱ ሀቡ። ዲብ በሊሱ “አወል ሲያሰዩን ኤረትርዩን ይእንበልሶም፡ እግልሚ ደሰቱር መስር ኢሰምሕ፡ ወሕነ እግል እሎም ክምስል ሳጅኢን ሲያሰዩን ክቡታምም ሕነ። ካልኦይት እብ ሰበት ጅንሰዩት አቶብዩ ለከሰስ እግል ጠለበት ኖሰኩም ተዕብየት ውደው እሎም። አትአመኖም፡ አክተንዐው ምንገብኦ። እሎም ከሰስ ቤለም።

እትሊ ወክድ እሊ አቶብዩ ሚ ትቤ፡ ሕነ ምነ ዲብ ከናል ሰዌጽ ለዐለ እግልነ ረኦይ ንትናዘል ወመጣርኩም እንበጥር፡ ክምስልሁመ እንቱም መስርዩን እብ ማይ ነህር ኒል ክምስል ምራድኩም ትንፍዖ፡ ወእብሊ ፍንጌ መስር ወአቶብዩ ሸበህ ውፋቅ ገብኦ።

መስርዩን ህዩ ህይለስላሴ ክምስል ገሴ ለኦሰራምም ዐለው ጠለበት ሐቆ ክም የም ጠለቀምም። ወዲበ ጠለበት እንዴ ገሰው እንቱ ወናዲኩም ክም ምራድኩም፡ ቤለምም። እትሊ ወክድ እሊ እድሪስ ሕመዳይ ዲብ ጃምቦት ክምስል ገሰ እንተ አየ ዐልክ ብዙሕ ቂብከ ወእዜ እግል ንትከበተክ ምሽክለት ቱ፡ አዜ ዲብ ሰር እግል ንትከበተክ ይእንቀድር” ቤለው። እትሊ መደት እሊ ቅያደት ጀብህት “ከላስ ሐቆ ጃምቦት አልቃህሪ ኢትከበተክ አስክ ዒራቅ ገሰ ወዲብ ጃምቦት በቅዳድ ወረቀትክ ቀድም” ቤለው። ሕመዳይ እንዴ ኢደንግር ምን መስር አስክ ዒራቅ ሳፈረ ወእባሁ ዲብ ጃምቦት ሕቄ ትሰጀለ፡ ወዲበ አተ።

እድሪስ ሕመዳይ ለዲብ ኤረትርዩ ዲብ መንጠቀት ምራረ ዲብ ዳንኩር ለአንበተዩ ሄራር ተዕሊም፡ አስመረ አተ እቡ ከዲብ መድረሰት መደበር ወመሐድ ሹለፈኦ አራሽዲን አተላለዩ። ምኑመ ዲብ ሱዳን ከሰለ ዲብ ከልወት ወሐቀሁ ዲብ ከርቱም እምድርማን ዲብ ጃምቦት አፍሪቀየ ወምኑ እንዴ አተላለ ዲብ መስር ዲብ አልኦዝህር በጽሐ። ክሉ እሊ ንዳል ጀላብ ተዕሊም እትገብኦ፡ ምን መስርመ ዒራቅ እንዴ ትሼበ ዲብ ጃምቦት በቅዳድ ባጽሕ ህለ። መጥመጦር እሊ ንዳል እግል ተዕሊም፡ ንዳል ጀላብ ሕርየትመ ለአተላለዩ ዐለ። ከሕመዳይ ዲብ ጃምቦት በቅዳድ ህዩ ገበይ ጣፍሐት እበ እግል ልሄርርቱ ገብኦ ዲብ መጽእ ክፋል ንታቤዕ።

ፈንቅል እብ ዕን ብዜን (1^ይ ክፋል)

ዮም ዓመት “ፈንቅል ገለድ ሕጡጥ” እት ሐንቴለ ትብል ሰቅራት 33^ይ ሰነት ዐመልየት ፈንቅል ወተሕሪር መዲነት ባጽዕ ዐየድነ። ክል ዎሮ ምስለ ዐመልየት ለልትጸበጥ ናዩ ዝክርያት ሀለ እግሉ። ለሐርብ ለቀንጸያተ እተ መዲነት ሽብህ ጋሻይት እንዴ እንተ እት ዐድ ኦሮ ትሸቁ ለዐለት ወሐቱ እንዴ ኢትደሌ እት ተሀርብ እብ በሐር እንዴ ፈግረት፡ እብ ጥያረት ወምድር እት ትግዕዝ ዐደ ለኣቱት ቢዜን ብርሃኔ ለትበህል ሻበት ቀደም 33 ሰነት ለጀሬት እተ ቅሰት እግል ተሓኪ እናቱ።

ሽጥንዲ ዑቕባሚካኤል

ርሕዩ እግል ኣትፋጌዕ ትመሺኮ ላኪን ጠምጠም ኢረከብኩ እቲ። መድረሰት ክም ደብኣት እግል እሸቁቱ ምን መንደፈረ ባጽዕ ለትከሬኩ። ኣቡዬ እግል እምዬ ለምለም እንዴ ኣምነ ሳራሐኒ። “እማነትኪ ለምለም ሕቼ እለ ወለት ነፈርመ እሉ ተኣምር ኣለበ” ምን ቤለዩ፡ ክምለ እት ዋልዳይትቼ ትርዔኒ ወተውዕለኒ ዐለት። እተ እለ ውዕለት ዐልኮ እንዴ ወዐልኮ ሀዩ ምሴ እተ እምዬ ለምለም ምስል ወለተ ትነብር ዲበ ለዐለት ጥዋሎት ዐይር ዐልኩ። ወክድ ክፍተት መዳርስ ክም መጽእ መንደፈረ እግል ኣቅብል ምንመ ዐለት እዩ፡ ረኪብ ወረቀት እጃዘት ሐረከት መታክል ምን ሳደፈየ ሒን ምህር ዞለ ምንዩ።

ለምስለ እግል ንሰከን ሳምሐት እነ ለዐለት ትርሓስ ለትበህል ወለት እምዬ ለምለም፡ መስኡለት ኣዋልድ ኣንሳት ዐለት። ብእሳመ ዎሮ ያቀብ ለልትበህል ኮሎኔል ኣቶብያይ ዐለ። ላኪን እተ ቤት ብዙሕ መጽእ እርእዮ የዐልኩ።

ኦሮ ዐድ ታሌኩ፡ ሽቅልዬ ወራት ቤት ኣሰለጦት ዐለ ፡ ምናተ እተ ዲቡ እሸቁ ዐልኮ ዐድ ሐቲ ላሊመ ምዩት የኣነ። እት መዲነት ባጽዕ ጋሻይት ሰበት ዐልኩ፡ ሽቅልዬ ክም ኣምዴኮ ኣጊድ ኣሰክ ቤት ትርሐስ ኣቀብል። ወምስል ኣብረህት ለትበህል ወዳይት ትርሓስ ሌጠ እትሃጀክ።

ምዕል እስተርእዮ ማርያም ምስል እምዬ ለምለም እት ቤትክሰታን ማርያም ጥዋሎት እንዴ ጊሰኮ ትዛዩርኩ። ለኣንሰ ለዲቡ ዐለየ እብ ቆናታት ጥዑም እት ለሐልየ ልተልህየ ዐለየ።

እዞም በዓል ኣያና ኣንሳላ ክዳናም
ጽባሕ ኣደይ ማርያም ክንመጽእ ኢና’ሎም
በህለት
ከረ ኣያይነ ለብላዮም ልባሶም ፈጅር ምዕል ማርያም መጽኣም ሕነ ቤለው

ልብለ ወዐለየ። እምዬ ለምለም፡ “ቅናጺ እነ ቢዘን ወለቼ ሰምዐወን ምን ገብእ እንዴ ነስኣወን እት ሰጅን እግል ለኣትወን ቱ” እት ትብል ኣሰክ ቤት ጌሰት እብዬ። ሐቆ ነግድ እስተርእዮ ማርያም እት ቀበት ሰለሰ ኣምዴላት ደርግ

እግል ብዝሓም ገባር (ሸዑብ) ሰላሕ ርፍዑ እንዴ ቤለ እት ገርግሱም ኣከበዮም።

ምዕል ኣረቡዕ ምሴ ወክሚስ ኣሰቡሕ ኣክራን ዘብጥ እንሰሚዕ ዐልነ። ሸዑብ ብዙሕ ልትሃጌ እቡ ምንመ ዐለ እግልዬ ላቱ ዐደድ እለ ኢሻቀሌኒ። እት ዐድነ እሊ መስል ኣክራን ክል ዶል ሰበት እንሰምዖ ወለ ባልዬ ኢህብክዎ። እብ ክሰብል እሸቅዮ ለዐልኮ ሽቅል ወእት ዐድነ ለኢህለ ዲብ ባጽዕ እርእዮ ለዐልኮ መናዝር እቡ እት እትዐጀብ እገይስ ዐለኩ። እግል ዐባዩ ወስያሰዩን ላቱ ሰኒ እት ሸቃላት ውብቆት ለካሬ ቴለል ዐለ።

ኣምዕል ከሚስ እግል ኣንፋር ኢሲፓ (እት ንዛም ደርግ ለኦሮ ወማርሓይ ሕኩመት ለዐለ

መ ይእቤለ። ሐር ላኪን “ንዒ እነ ከመ ብዜን ወለቼ” ክም ቴለተኒ ቱ ኣሰክ ኣየ እት እብል ለትሰኣልኩ። ኣሰክ ወልደንኪኤል ለልትበህል እት ጅወት ባጽዕ ለነብር ወልደ እግል ኒጊስ ክምቱ ዶል ኣሰኣለተኒ ትበገሰኮ ምስለ። ምናተ እብ ለትፈናተ ባባት ፈገርኩ። “እንኪ እሊ መፍትሕ፡ እንዴ ደብኣክዩ ኣሰክ እንደ ማርያም ሕለፊ” ትብለኒ። ወህተ እበ ባብ ዎሮ ትፈግር።

ኣነ ኣሰክ ፊድ ሲ እንዴ ሐለፍኮ ምን ትጸበርክወ ደንገረተኒ። “ሄዩእ! እለ እሲት ኣየ ጌሰት?” እንዴ እቤ ቤት እንዴ ኣቅበልኮ ምን እርኡ፡ ክሉ እንዴ ትዳበኣ ጸነሐኒ። ኣሰክ ዐድ ወልደ ጊሰት ተሐይስ እቼ እንዴ እቤ እት እትሰኣል ለቤት ዐድ ወልደ ረከብኩ። እግል ኣቡዬ ወልደንኪኤል ምን ትሰኣልክዎ፡ “ከንዶእ፡ ከኣየ ጌሰየ?” እንዴ ቤለ ለሰኣል ዲብዬ በልሰዬ። እንዴ እትፈከር ከለልኮ ወከለልኮ ከእት ጥዋሎት ኣቅበልኩ።

ክም ኣቅበልኮ ለቤት

ለውላደ እንዴ ከምከመት ምን ዕዳገ እት ተሀርብ ጥዋሎት ለኣቱት እሲት ኣቡዬ ዐንዴ ክም ረኡተኒ ትፈከረት እቼ” ሚ እግል ቲደይ ተረፍኪ በሪ ወዴኪ?” ትብለኒ።

“ምን ኣየ?”

“ምስል ከረ ትርሐስ ኣፎ ኢጊሰኪ?”

እት ገይሰ ክም ኢረኡክወ ዶል ኣሰኣልክወ “ኣዜመ ጊሲ እኪ፡ እለ ሐቲ ርሕኪ ሚ ጸብጠተኪ ከእትለ ምስልነ ተርፊ፡ ሕናዲ ኣጀኒት ብነ ኣየ ኒጊስ እቦም፡ እተ እንገይስ ኣለብነ። እተ ሚነት እንዴ ግስኪ እተ ዲበ ልትጸገዐ መራክብ ትጸዕኒ” ትብለኒ። ክእነ እንዴ ትቤ ክም መክረተኒ ለዶልቱ ሰፈር ከረ ትርሐስ ኣሰክ ኣየ ክምቱ ሸበህ እግል ልትፈሀመኒ ለኣንበተ። ምናተ መጋይስ እምዬ ለምለም ኣክለ ሀነ ፍክር ገኣ እቼ። እብ በንበኩ ባባት ክም እንፈግር ለወዴትመ እግልዬ እግል ትሕደግ እንዴ ትቤ ለኣምጸኡቶ ፍክር ከይነት እንዴ ገኣ ትረኡኒ።



ሕዝብ) ሌጠ ለከሰስ እጅትመዕ ገብኡ። ለእጅትመዕ ሸዑብ ዓዲ ለለኣምሮ የዐለ። ክል ዕዱ ኢሲፓ ወዓይላት ሰብ ሰልጠት ሕኩመት ወኣንፋር ዓይለቱ እንዴ ኢልትኣመሮ ወሐረካት እንዴ ኢወዴ ምንለ እት ሐንቴ መራቀቡቶም ለዐለየ ከፈፍል ባጽዕ እብ መራክብ እግል ልህረብ መምሬሕ ተሀዩበ። እብ ኣሳስ እሊ ጅምዐት ሽቅልዬ እንዴ ኣምዴኮ ኣሰክ ቤት ትርሐስ ምን እመጽእ እምበል እምዬ ለምለም ትርሐስ ውላደ ወወዳይተ ኢጸንሐወኒ። እግል እምዬ ለምለም ምን ትሰኣልኩ፡ ትርሐስ ውላጄ ንድኡ እቼ እንዴ ትቤ መንኪነት ነድኣት ከነሰኣተን ትብለኒ። “ኣሰክ ኣያ!”

ክፍትት ጸንሐተኒ። ሰልፍ እምዬ ለምለም ኣምስልኩ፡ ወሐር ምን እርኤ እሲት ኣቡዬ ዐንዴ እብ ውላደ ቤት እንዴ ከፍተት ዲቡ ጸንሐተኒ። ዓንዴ በህለት ዲብ ዕዳገ ነብር ለነብረ ብዕድ ወልዳ እግል እምዬ ለምለም ቱ።

ጅምዐት እት ባካት ዕዳገ ወእንደ ምክኤል ሐርብ ድቁብ ውዕል ዐለ። ሸዑብ ባጽዕ ሀዩ ርፍዕ እንዴ ቤለ ጥዋሎት ኣተ። ለናይ ሰነት 1977 ባጽዕ ናይ ሐረርት ጀርቤ ጀብህት ሸዕብዩት ተሕሪር ኤረትርየ እት ፈቅድ፡ ለሐርብ እግል ከረ ጥዋሎት፡ ጅወት ባጽዕ ወረኣሱ ምድር ኢለዐሬቡ ለልብል ወግም ለዐለ እሎም ኢልትሐገሎ።

ክምለ እሲት ኣቡዬ ዐንዴ ታብተተኒተ እግል ኢዴ ኣሰክ ለሚነት ግስኩ። ሚነት ኣይተት የኣምር ላኪን እተ ኣፊት በጽሐኩ። እግል እትዐወት ምን ኢቀደርኮ ሀዩ ኣቅበልኩ። ምስል ዓይለት ዐድ ዐንዴ ዲብ ቤት ትርሓስ እት ሀሌነ ሙናድሊን ለለክፈወ ቁምብለት ከሺነት ትርሓስ ሸወጠት። ሐቲ መደረት ምንመ ኢወዴት እብ ድንጋጽ በረጌዕ ገኣነ። ለእበ እንገይስ በዴት ምንእነ።

እብ ሐዲስ ሰንበት ንኢሽ ገጩ ኣሰክ ሚነት ግስኩ። ለታግ ቦት(ጀልበት) ምን ቃብል ሸዑብ ትጽዕን ረኡክወ። ደኣም ምነ ሸዑብ ለብዙሕ ሐድሐዳይ

ሌጠ እንዴ ነስኣት ትገይስ ዐለት። ለሚነት ትዘበጥ ሰበት ዐለት ሀዩ እንዴ ሰክነት ኣዳመ ትጽዕን የዐለት።

ሸነጥ ለኣብዘሐት ሐቲ ወለት እተ ባብለ ሚነት ጸንሐተኒ። እግል እትሰኣለ እት እብል ሀዩ ሐቲ መንኪነት ዐስከርየት እት ባክነ በጥረት። ህተ እሉ ትታኪ ሰበት ዐለት ኣጊድ ዐፍሽ ወነፍሰ ትጸዕነት። ለበዐል መንኪነት እግልዬመ እግል እትጸዕን ክም ኣሸረ እዬ ምስሎም እንዴ ትጸዕንኩ ሚነት ኣቲኩ።

ለለትፈክር ኣነ ቀደምለ ሴድያይ ለዐለ እለ ወለት እብ ሸነጠ እተ ታግ ቦት ኣቲኩ። ህተ ዐፍሽ ምን መንኪነት ኣሰክ ትከሬ ወኣሰክ እት መርኩብ ተኣሸእኅ እብ ቅሩብ ወክድ በደርክወ ከኣቲኩ። ደንጎበ ናይለ መጅሙዐት ለህ ኣናቱ ለዐልኩ። ዕርግ ለወዴክዋተ ለኩብትን “እሎም ኣብጽሕ- ትበገስ!” እንዴ ትበህለ ተኣዘዘ።

ምን እለ ሰዐት እለ ወሐር ክቡድ ኣሰለሓት ጀብህት ሸዕብዩት እተ ሚነት እግል ልትዋገር ኣንበተ። ለጽዕነትነ ዐለት ታግቦት እግልነ እት ሐሌብ ለትበህል መርኩብ ተኣክሰነ ዲብ ሀሌት፡ ብዕደት እለ ትመስል ሀዩ እግል ምንእነ እንዴ ተርፈው ዲብ ሚነት ልትጸበሮ ለዐለው እንዴ ኣቅበለቶም እግል ትጽዐኖም እንብትት ዐለት። ለግራነ ዐለው ክሎም ከዋድር ኢሲፓ ክም ዐለው ለምስልዬ ጽዑን ለዐለ ኣዳም ልትሃጌ እቦም ዐለ። እሎም ኣንፋር እሎም እት መርኩብ ብዕደት እግል ልትዐደው ሰበት ገኣውቱ እግል ታግቦት ለሐቲ እግል ልታክው እንዴ ሐደግናሆም ለመጽኣነ። ምናተ በክት ኢወደው፡ እተ ታግቦት እግል ልትጸዐኖ ክም ኣንበተው ቀዝፍ ክቡድ ኣሰለሓት እግል ታግቦት ወእግለ እተ ዐለ ኣዳሚን እት ሕድ እንዴ ረጭቀ ኣብደዮም። ለዲብ ሚነት ምስልዬ እንዴ ኣቲት ግራዬ ለተርፈት ወለት ምስሎም እት ትጸበር ሐደግክወ። ለብቆት ክም ሳደፈቶም እግል እንዴ ፈቀድኮ ደንገጽኮ ወግሃኩ።

እተ በሐር መራክብ ብዙሕ ወለትፈናተ ዐለ። ምነን ስታር ኦፍ ማሳወ ለትበህል ኣዳም ብዙሕ ጽዕነት ዐለት። ሕናመ ምን መርኩብ ሐሌብ ዲብ መርኩብ ስታር ኦፍ ማሳወ ተዐዴነ። ምን መርኩብ እት መርኩብ እንንክሰ እት ሀሌነ ዐፍሽ ወሸነጥ የም ኣለቡ እት በሐር ተርቀ። እት ረኣሰለ ዐለ ፍጀዕ ወመትሀላግ ለልዐድያነ ዐለየ ክመ እት ጀልበት ቀላይል ሰበት ገብኣየ ብዙሕ ልትሐረክ ዐለየ።

አተላላይ መቃበለት ርኢስ ኢሰያሰ.....



እትለ እግል ትትዘከር ለበ ለአወላይ ወለካልኣይ ሕሩባት ክምሰለ ለልትሐዜ መትዳላይ ኢጉብኦ እግሉም። እግል ወያኔ ልግበኦ ወመናቢተ ለአክለጤ፡፡ ፈደራል ለልትበሀል ዲሽ አለቡ። በህለት ናይ ኢትዮጵያ ዲሽ ወጠኒ ለልትበሀል የሀሌ። ወያኔ ህዩ አክልሕድ ሰበት ተአምሩ ወእግል መደት 30 ሰነት እግል ፈንጠሮቱ ሰበት ሸቄት፡፡ እግል ትዳፌዕ ወትክራዕ ለትቀድር ቅወት አለቡ። ለዲብ ጀብሀት ቅብለት ኢትዮጵያ ለዐለ ዝያድ 32 አልፍ ቱ። ምኑ ለዝያድ 10 አልፍ ከዋድር ወያኔ ዐለው በህለት ናይ ወያኔ ዐሳክር ቶም። እተ ወቅት ለሀይ እግለ 32 አልፍ ዲሽ ጀብሀት ቅብለት ኢትዮጵያ እንዴ ከርደንክ ሰለሕክ ክሬ እንዴ ቴልካሁ እግል ትፈንጥሩ ለቀለ ሸቅል ዐለ። ከዲበ ሰልፋይት ጀርቤ እግል ወያኔ ወመናቢተ ለአክለጤ ኢሀለዮት ዲሽ ፈደራሊ ቱ። እብ አማን ህዩ እስትራተኛዮት ወያኔ ሽዑብ ወወጠን እንዴ ትፈንጥር፡፡ ኖሱኖሱ ሕድ እንዴ ተአበልዑ፡፡ ዲብ ለኢፈግር ምኑ ክላፋት ወነዐር ሸሚሙ ወአትሐወናት ዲሽ ወጠን ሰበት ዐለ፡፡ ለቅወት ዲሽ ፈደራል እዴ ጋብኦት ዲበ ዐለት። ሕልም ወእስትራተኛዮት ወያኔ ትትበገስ እንዴ ህሌት እግል ኢትዮብዩ እብ ከኦፎ እግል ትምርሕዋቱ ምን ልትበሀሉ፡፡ እለ ዐድ እለ እግል ንምራሕ ገብኦን ምን ገብኦ፡፡ እንዴ ፈንጠርናህ እግል ነኣትመቃርሐ ብዝ። እትለ ለቅም ወእት ሎህ ለቅም እንዴ እንደፍን እግል ንምረሐ ብዝ ለትብል ተ። ምን ሐረስ እለ ዲብ ኢትዮጵያ ደሐን ወአምን ለለአክድ ሙአሰሳት አምን ወዲሽ ወጠን የዐለ ወኢትብዝ፡፡ ከለ አወላይት ጀርቤ አሰባብ እለ ዐለ። ለተፍኪር ላኪን ሐቐ መራቀብት ኦዲስ አበቤ ሸንክት ቅብለት በህለት አሰክ ኤረትርየ መትወላብቱ ለሕልም። እተ ካልኣይት ጀርቤ ምን አወላይ ወራር እበ ለትረከበ ተጃርብ፡፡ እብ ጀሀት ፈደራል ለሐሰ መትዳላይ ገብኦ እግል ልትበሀል ቀድር፡፡ ምናተ ለሐርብ እት እዴህም የዐለ። ወያኔ ወመናቢቱ ቶም ለቀሩሩ። ሕነ እግል ኖሰነ ዲብ ናይ 80 ሰነት ታኢረክነ፡፡ ሕርያን ሐርብ ዲብ እዴነ የዐለ። ለሕርያን ናይ መትብግሰቱ ቱ። እንተ ህዩ እግል ርሕክ ወሀለዮትክ እግል ትዳፌዕ እበ ሕርያኖም እንዴ ትቀሰብካቱ ለተኣቱ ዲቡ። ከለ ሕርያን ናዮም ሰበት ዐለ፡፡ ለካልኣይ በክት መጽእ እንዴ ህለ ለከፌ መትዳላይ ጋብኦ ዐለ። መቅደረት ብቅዕት ዐለት፡፡ ወናይ ወያኔ ህንዲዶ እግል ትክረዕ ለትቀድር ሐለት ዐለት እንዴ ትቤ እግል ትትሃጌ ኢትቀድር። ምናተ ዲብ ኢትዮጵያ አትፋዝየት እግል ልግበኦ ሰደ። ለመርሐለት ለሀ፡፡ ፈሀም ወቀለት ወለዐለ መትዳላይ ወመትከምካም አትሐሰሴት። ምናተ ክምሰለ እለ እምቤ ሰበት ትከለፈት ዲበ ለትትሐዜ ደረጀት ኢበጽሐት።

እትለ ሳልሰይት መደት፡፡ ሐርብ ድድ ንዛም ፌድራሊ ዲብ ኢትዮብዩ ወሙአሰሳቱ ወምለዐል ኩሉ ድድ ሰያደት ኤረትርየ ሐርብ ተዐለነ። ሕነ ህዩ እብ ከኦፎ ምን እንሸቄ ለሐይሱ ሚ እግል ኒዴ ክም ብዝ። ምነ ለለሐልፈው ክልኦት ወራራት ለደረሰናሁ ሰበት ሀሌ፡፡ አዜ እትለ ሳልሰይት መደት አግቡይ ወበሰር ሸቅልን እግል ነኣትሳኔ ወነኣትኣይሰ ብነ! ለልብል ረኣይ ትከለቀ። እለ ህዩ እት ፍንጌ ከለን መቅሬሕ ሸቅል ሕበር ክልቀ። እት ረኣሰነ እብ ዛህር ሐርብ ሐቐ ተዐለነ፡፡ ለሐርብ ሕርያን ኢኮን ላኪን እብ ሕበር እግል ንሸቄ፡፡ ምነ ሐርብ እግል ሰላመት ሕበር እግል ንዳፌዕ፡፡ እለ ክራም እለ ወመናቢቱ፡፡ እምበል አትካራም ምን ወራር እት ወራር እግል ልትዐደው በክት እግል ነሀሪም አለብዝ። እትለ ለህሌነ ዲበ መንጠቀት ሰላም ወመስኩበት እግል ልትመደዳበን፡፡ ዲብ ድወል ግዋሬናመ እተ ክምሰሌህ ሰላም ወአምን እግል ለሀልዮ ገብኦዮ ምን ገብኦ እለ ህንዲዶ እለ እግል ልትኣደብ ቡ ለልብል ተፍኪር ትከለቀ። ከለ ወዲናሁ ተቅዩር ዮም ልትረኤ እንዴ ሀሌ፡፡ እተ ሸቅል ሕበር ተረት ዐባይ ዐለት እግሉ እግል ልትበሀል ቀድር። ምን ሐረስ እለ ሚ ወሚ ሓሰባም ክም ህለው፡፡ እበዩ ወእበዩ እግል ለሃጅሞ ክምቶም፡፡ መቅደረቶም ከኦፎቱ፡፡ አክል አዩ አዳም ወጽዋር እትዳልያም ክም ህለው ምን ቅሩብ አምራሙ ሰበት ህሌነ፡፡ ለሕርያን ሐርብ ላኪን ናዮም ሰበትቱ ወህቶም እበ ለሐረወ ገበይ ወለለኣነብቶ ዲቡ ወቅት ክሉሳሙ ሰበት ህለው፡፡ ሕነ ምን እለ ብቐት እለ እግል ንዳፌዕ፡፡ እብ ሕበር ንትዳሌ ትባህለ ወምሰል ሸቄነ።

እብ ናይነ ረኣይ እለ ሳልሳይ በክት ምን እዴነ እግል ልምለጭ አለቡ እግልሚ ሕነ፡፡ ወድዋርነ ሰላም ወመስኩበት እግል ንርኩብ ወህቶምመ እግል ልትኣደቦ እግል ልቅደሮ ቦም። ለትሰረረተ ዲመ ዲብ ህንዲዶ እግል ልንበር ገብኦው ምን ገብኦ፡፡ ለመንጠቀት እግል ትትበጭብጭ ሰበት ትቀድር እግል ልትሰይሐ ቦም። ህቶም ሐለቶም ወመቅደረቶም ክሉ ረኣሱ ኢለኦምሮ። ክሉ ለለሐሰብ ወለወድዉ ሕልም ቱ። ለገምምም ወአማውር ለሀህዩም እግል ኖሶም ምናም ልትኬለሞ። ናይ ዋሽንግቶን ንዛም ወቴልዮቱ ክእነ ወክእነ ወደው እት ልብሎ ዳሩትም። ህቶም ላኪን እብ ኖሶም እግል ልጌዋ ለቀድሮ ኢኮን።

ሰበት እለ፡፡ ህቶም እለ በክት እለ ምህምቱ ልብሎ ዲብ ህለው እብ ደሚሮም ሰበት አምነው እቡ ቱ። እለ ህቶም ናይ ደንጎበ ወምህምተ ለቤለወ እግሎም ድራሰት ለተሀይብ እግል ትግበኦ ቤ፡፡ እብ አማንመ ሰላም እግል ተአምጽእ ወሐርብ ካቱመት እግል

ቲዴ እግሉ ገብኦክ ምንገብኦ፡፡ ልብጉሳም እሉ ህለው በርናምጅ እግል ለአክትም ቡ። ለዲብ አርድ ለዐለ ተጠውራት ረኤካሁ ምን ገብኦ፡፡ እብ አማን ተምሲልየት ቱ። ለናዮም መዳሊት ሌጠ እንዴ ኢጉብኦ ለእብ ቃብሉ እግል ህጁም ምዳድ ለገብኦ መትዳላይ ምነ ሐልፈ ተጃርብ ለትከሰበት አፍካር ወአግቡይ መትካም እት ወግም እንዴ አተ፡፡ ወቅት ኢነሰኦ። ሰበቡ ለገያደት እግል ኖሰ፡፡ ወለጀሬት ከሳር እት ጄሽ ወያኔ እለ እግል ቲበሉ ኢትቀድር። ዲብ ቀበት ሰለሰ ሳምን ለኢተምም ወቅት ክለ ሚርሐት ክራም ወያኔ እግል ትብኬ አሰተብዳት። እግል ትህረብ ትትከማከም ዐለት። እግልሚ ለተጠውራት ምን ቅያሰ ወለዐል ሻፍግ ወድቁብቱ ለዐለ። ለሸቀላት ዝያደት ምን ክራም ወያኔ እት ንዛም ዋሽንግቶን ትዘይድ ዐለት። ሚ ኒዴ ወሚ ንፍዐል፡፡ አድሕኑን ወኣተክሩን ትበሀለ። እብ አሳስ እለ ዲብ ዮም 24 ኦክቶበር 2022 እጅትመፅ ፕራቶርየ እግል ልግበኦቱ ትበሀለ። ዲብ ጅቡቲ ለሀለ ጄሽ አሚሪክ ዋያረት ነድኦ፡፡ መቀሌ ትከረይ ትበሀለት፡፡ ወምን መቀሌ ዲበ እጅትመፅ ለሻርኮ ሚርሐት ወያኔ እንዴ ነሰኣት ጅቡቱ አቅበለት ወምኑ አሰክ ፕራቶርየ ግብለት አፍሪቅዮ ኢበጸሐቶም።

ዲብ ፕራቶርየ እለ ዱሊት ለህሌት ወረቀት ፈርሞ እተ ትበሀለው። ንዛም ዋሽንግቶንቱ ክሉ ለአትመመዩ፡፡ እብለ ኢብሳንጆ ህለ ወእብለ አሁሩ ወብዕዳም፡፡ ለወረቀት እንዴ ትዳሌት ፈሩመ ትበሀለው፡፡ ሕርያን ብዕድ ሰበት ይህለ ክመ ትበሀለወ ፈርመው። እለ አዜ ናይለ ገይሰ ለዐለ ቴለል እግል ዐንቀፎት ለትመሀዘ ታክቲክቱ። ምን ሽፌ አሰክ አክሱም ዐድወ ወዐዲግራት ወመቀሌ እንዴ ትቤ እብ ጂኦቅራፍዮት እግል ትትሃጌ ትቀድር ላኪን፡፡ እብ ዓመት እግለ ሰተተዉ ህንዲዶ ዲብ ሰኒ መብቅያይ አዋይን ሰበት አተዮም፡፡ እለ ህዩ ለእለ ወደው እንዴ ወደው እበ ገብኦት ገበይ ወመሰምስ እግል ለዐንቀፋ ቦም። እትለ ወክድ እለ ክራም ወያኔ እምበል አንግፋነ ወኦድሕኑን ለወድዩ ሴመ አለቡ። ለህምመ እግል ለአድሐኖም ግረ ኢትዋለበው፡፡ ላኪን እግልሚ ዲብ ፕራቶርየ፡፡ እግልሚ ኣካን ብዕደት ኢተሐራት ወግራሁ እግልሚ ዲብ ናይርቢ፡፡ እንዴ ትቤ ሰኣላት ብዙሕ እግል ትሰኣል ትቀድር እለ ወክዱ ክምሰል ተመ እግል ልትሀደግ ዲቡ ቱ። ላኪን ለናይ ደንጎበ በዴነ ክምሰል ትበሀለ በደው ሰበት እለ ነድሕናም ንባለሐም ወነኣተክርዮም ትበሀለ ወእለ ናይ ጅቡቲ ዐመልየት መጽኣት ወዲብ ፕራቶርየ ፈርሞ ትበሀለው ወዲብ ወረቀት ፈርመው። ሰላም ሰላም ትበሀለ። ሰኒ፡፡ ናይ ቀሰቦት ኢኮን

ለመሰኣለት፡፡ እብ አማን ሰልሐም እግል ልሰልሞ ወዲብ መዐሳክር እግል ልእተው ገብኦው ምንገብኦ፡፡ ላብድ ኢኮን ለሕሰብ ህለ ሸቅል እግል ልትመም።

አዜ ለናይ ንዛም ዋሽንግቶን ሸግረት ሚተ፡፡ ምን ሐዲስ እግሎም ምነ ክሩያም እተ ለዐለው ተልገ እንዴ አፍገርኩ፡፡ እንዴ ፈግነወ እግሎም ለገብኦ እግል ልባሰሮ እቱ ለቀድሮ አዋይን ትከልቅ። እብ ብሼሽክ ህዩ ትወጠ እግልክ ምን ገብኦ ሐርብ ሐዲስ ተሀርሱ። ሕነ እብ ጀሀትነ ብዙሕ ለለኦሰፍ ቴለል ይዐለ እግልነ። እትፋቅ ትበሀለ፡፡ ሰኒ ለእትፋቅ ክምሰለት ተበሀለዮ ዲብ ፍዕል ልውዐል፡፡ እት ፍዕል እንዴ ኢልውዕል እለ ወሎሂ እንዴ እምቤ እግል ንትሃጌ ይእንቀድር እብ ፍዕል እንርእዩ። በዐል አመል አመሉ ሰበት ኢለሐድግ ላኪን ክሉ ሸእ አክተመ እንዴ እምቤ ኢንትሀመል እግሉ። ለእብ ጀሀቶም ለሀለ በሰር ሐዲስ ሚቱ እምቤ ምንገብኦ፡፡ “ሕነ ሰላም አምጸኦነ ሰበት ናደልነ ወሰበት ትጻገምን” ልብሎ፡፡ ሚ ሰላም አምጸኦው፡፡ ናዮም ሐሰት ወኦደፋራስ ቅያሰ አለቡ። እብ ሰበት እለ ለሰላም ለሀህንእ ለትፈናተ መሰምስ እግል ልምጸእ ቡ። እለ ሐቐ ፈርመት ለመጽኣ እብ ንዛም ዋሽንግቶም ለልትፈብረክ ቱ። ኦሮ ምኑ ኤረትርየ ኢፈግረት፡፡ ኤረትርየ ልሰዕ ዲብ ምድር ትግራይ ህሌት፡፡ አዳም ትቀትል ወመምተለካት ትዘምት ህሌት ልትበሀል። እለ ክሉ መሰምስ እግለ ለፈርመው እተ ወሲቀት ሰላም እግል ሐምረጎት ወኣትራዮምት ወቅት ቱ። ዲብ ኢትራያም ወቅት እግል ልምጸእ ለቀድር፡፡ እብለ እንዴ ትነፈዐክ አዜመ ከኦፎ ሰታቲብ ሐዲስ ተአመጽኦ፡፡ እለ ዲብ ንዛም ዋሽንግቶም በሰር ሓዲስ ኢኮን። ዲብ ብዕድ ድዋራት ዐለም ዶል ትገይሰ ልትረኤከ። ለኢተአምሩ ተጠውራት መጽኤክ ምንገብኦ፡፡ አሰክ ተአምሩ ትምህጹ ወነዐር

ትከልቅ። ዲብ ቀበተ ነዐር ወቅት ተኣትራይም ወዲብለ ትራዩመ ወቅት ስታቲባትከ ተኣትሳኒ። እላተ ዲብሎማሲ እት ልብሎ ለለሃዱገ ትልህያሆም።

አዜ እለ ክሉ ገብኦ ለሀለ ፊራርታት እዘን ለለኦጸምምቱ። እለ ወእለ እንዴ ትቤ እግል ትፈንትዩመ ኢትቀድር። እብለ ናይ ዋልቃይት ህለ ወእሎም ምን እለ ምድር እለ ኢፈግረው፡፡ ዲብ ትብል ወቅት ለለኦበዴ ፊራርታት ለልትወሐ ኢኮን። እለ ለትፈረመ ሕኔት ዲብ ፍዕል ልውዕል ዕንቡ ዝላሞ ትብል። ብዕድ ሕርያንመ ኢሀለ። ራብዓይ ህንዲዶ እግል ልትአምበት ገብኦ ምንገብኦ፡፡ ምን ኣመረ ኢልትአመር፡፡ ላኪን ዲቡ ለነሰእ ቴለል ወበክት ሰኒ ጨቢብ ቱ። እግልሚ አዜ ሐዲስ ጄሽ እንዴ ዝምከ መሰምስ እግል ቲዴ ሰዱድቱ ላኪን እለመ ወክዱ ክምሰል ተመ ንትሃጌቡ። ሕናመ እትለ ለህሌነ እቱ ወቅት እንረኤ ወእንታቤዕ። ጋብኦ ለሀለ እትፋቅ እት ፍዕል ልውዐል ወኢልውዐል ለክይቡ ፍርድ ኢሀለ።

እብ አምዕል አምዕሉ ልትወሰክ ለሀለ ሐዲስ አፍካር ሀሌ። ዲብ ደንጎበ ላኪን ፈድል እለ ለገብኦ ሰብር ወለትነሰኣት ምስዳር አደቦት፡፡ ዲበ ለሐሰ አዋይን ህሌነ እንዴ ትቤ እግል ትትሃጌ ትቀድር። እለ ጋብኦ ለሀለ እግል ልትበደልቱ እግል ቲበል ኢትቀድር፡፡ ምናተ እለ ናይ ማሌ አድረሰዮም እግል ልግበኦ ቀድር፡፡ ከም አምኣት ኣላፍ እፍኑያም ህለው። ክእነ ለመሰል ዲብለ ገብኦ ልግበኦ ሐርብ ርኡይ ወሰምዕ ኢኮን። የምክን እለ ለለአሙሩ ተቃረሮም እግል ለሀሪ ቀድር። ፈንጎሕ ፈጅር ላኪን እለ ህንዲዶ እለ ካልቁ ለሀለ ደማር ወከሳር እለ ወእለቱ እንዴ ትቤ እግል ትናቅሽ እቡ ለልትቀድር ኢኮን።

ዲብ ገጽ 10 ልተላሌ...

6^ይ ክፈል

ተሰዬሕ ዲብ ቅሶት ‘ተመህ ቀደር’

ሐይላም ቄርአት ጀሪደት ኤረትሮፕ ሐዳሴ ለእብ የሰፍ እድራስ አሟር ምን ቅሶስ ነጂብ መሕፋዝ ለተርጀመት ወዲብ ጀሪደት ኤረትሮፕ ሐዳሴ እብ ከፈፍል ትፈግር ለሀሌት ቅሶት “ተመህ ቀደር” ምን ጋይ ክፈል ወሐር አካን ሰባት ሰረት፤ ምን እሊ ክፈል እሊ ግረ እንዴ አቅበለት ጀላብ እግል ትጸባጥ እግል፤ ዲብ ሳምሐኑ ግረ እንዴ አቅበልን ምን ንጡር ለዐለ ጽበጠ ትተላሌ፤

ሓቆ መደቲት ሐ’ጫር አሟር “ሆርዳዴፍ” ምስል አሮት ብዋረቱ ሐ’ጫር ወመማኒት ገርቡ ሰኒ ትሩድ ላቱ እናሰ ዐቅበለ፤ ለእናሰ ግንሓቱ ሰኒ ትርድት ውዕንታቱ ሰም ለኢልብል፤ ወለረአሱ እብ ሺቦት ለትካፈለ ወለነሐሩ እብ ገዘፍ ሸክም ለትገልበበ ዐለ፤ ዕ’መት ባርሀት እንዴ ዐ’መ ጸገት ረዶም ወሰኒ ዕክት እብ ልትመንቀሽ ዐለ፤ ለአሟር እንዴ ረክዐ ክም እለ ቤለ፤

- መንባዬ! ገብርክ ወፈታይክ ላቱ “ዲዲ” ለሽሐርታይ ማጽእ ሀለ፤

ለሽሐርታይ እተ ቀደምለ መልክ እንዴ ሰጅደ እግለ እተ ሐንላ እገሩ ለዐለ ምድር ሰዐመ፤ ከእብ ክርን ድሀርት ክምእለ ቤለ፤

- መንባዬ ወድ ሽኑም፤ በርሀትላ ፋግረት ጸሓይ፤ ወረቢ አልዓልሚን፤ መጅዱ ሊዱም ወለውቀት ወፈርሐት ልዲራሁ!

ለመልክ እብ ረሕመት ትከቡተዩ ወእተ ጀፈሩ እተ ኩርሲ እንዴ አትገሰዩ ክም እለ ቤለ፤

- ዲብ እለ እዲነ እብ ሰብዐ ዓመት ባድርዬ ዲብ እንተ ሚቱ አሰክ እለ ምን ኢትረኤነ?

ለድግለል ሽሐርታይ እብ ሕሽመት ክም እለ እት ልብል በልሱ፤

- ረቢ ዕምር ዋዉል ወዓፍየት ወነፍሰ ዋሪት ለሀበክ እንሻለ፤ እዬ መስል ክም ትላኪካሁ መጸአከ፤

ለመልክ ተበሰም ወደ፤ ወሰኒ እዩሰ እቡ እት እንቱ እንዴ አቅመተዩ ትሰአለዩ፤

- “ዲዲ” አማን ቱ እንተ ብዙሕ ዐጃይብ ወምስተንክር ትሸቄ ሰምዐኩ፤ እብ እማን እንተ እ’ዳም ልግበእ መሔዋን ክም ምራድክ ትወድዮም፤ ወምን ገጽ ዘመን ሕርበት ቁብ ትሸንኪ?

ለእናሰ እግለ ረአሱ ለሸከሙ እተ ነሐሩ አሰክ ልትከሬ አድነዩ፤ ክክም እለ ቤለ፤

- እለ ላተ ሸክ ኢትውዴ እተ መንባዬ፤

ለመልክ ሀይ፤

- እለን ዐጃይብክ ምነን ገሌታይ እግል እርኤ ሐዘኩ፤

ለወቅት ተመ፤ ለዕንታት ኩሉ አፋዘዘ ወላመ አግጸት ዐቢ

ተመህ ቀደር

መትአያሰ ትረኣ ዲብ፤ “ዲዲ” ለሸቅሉ ኢሸፍገ እቱ፤ እግል መደቲት እተ አካነቱ ክም ዕጫይ ወእበናይ በዋረ፤ ሐር እብ አንያቡ ባቅዕ ተበሰም ክም ወደ ሻፍግ እት እንቱ እግለ አግጸትለ አዳም አቅመተ፤

ከእግለ መልክ ክም እለ ቤለዩ፤ - እብሊ አንክርለ ማንዬ እብሊ ፍዕልዬ ለኢለአምን ልብ እት ለሀንድግ ልትሰመዕ ሀለ፤

ጸር ፈርዑን ተዐጀበው ከአሕድ አትቃመተው፤ ለመልክ ፈራሰትለ እናሰ አፍረሐቱ ከእግለ ጸሩ ትሰአለዮም፤

- እት ፍንጊኩም እብሊ ምስተንክር ናይ “ዲዲ” ለኢለአምን ምን ሀለ?

“አርቦ” ለቃይድ እብ ቅብብ ረአሱ ነክነከ፤ ከዲብለ መልክ እንዴ ቀርቦ ክም እለ ቤለዩ፤

- መንባዬ፤ አነ እሊ ቃሸሸትለ ሸሐረቲት ቦታተን ይአምን እቡ፤ ገሌ ፋድያም ላቶም ወሸቅል ለአለም ለወድዉ ኑዕ ናይ ምህዞታት ሌጠ መስለኒ፤

አዜመ ለመልክ፤

ውቅል እንዴ ትሰሐቀ ከእግል “አርቦ” ልተርጀግ እቱ ክምሀለ እብ ትመስል ገበይ ክም እለ ቤለዩ፤

- “አርቦ” ለነፍሰክ እግኑዕ ምነ ሀሌክ ገብእ?

ለቃይድ እብሊ ለአትፈክር ሐጠር ክም እለ እት ልብል በልሱ፤


- ርሕዬ አክለ ዐቅልዬ ለትልህያታት ሸሐረቲት ኢልትከበት ሌጠ እፈትዩ፤

አሟር “ሆርዳዴፍ፤ ለገጹ እብ ሐሩቀት ሕመት ገልቡብ እት እንቱ፤ ወእብ ክርን ሰኒ ቀልዕት እግለ ቃይድ ክም እለ ቤለዩ፤

- ከክም ሸንሀትክ ትግበእ እከ፤ መንባዬ መልክ፤ ግድም “ዲዲ” እሊ መትፋራድ እሊ እግል ልብለሰ ዲቡ አጅዞ እሉ፤

ለመልክ እግለ ሓርቅ ለዐለ ወልዱ እንዴ አቅመተ፤ አሰክለ ሸሐርታይ ትወለበ ወክም እለ ቤለ፤

- ከዩለ፤ ለሸሕርክ እግል ጽንዒን መለሀይን “አርቦ” እብ ከአፎ ክም ለአተክሙ እሰኬ አርኤኑ፤



- ከለእናሰ እሊ እተ ቀደሚነ ለህላቱ ማሚ? እለ ህግያክ አዜ ሚ ፋእደት በ? ሀዩ ሐዩት ሳርዕ እንዴ አምጸእኩም፤ እሉ ጠልቆ ዲብ፤ ከከፎ ክም ሸምሕሩ ወእት ሐን እራደቱ ወድዩ እግል ንርአዩቱ፤

ለቃይድ ላኪን ህግያለ መንባሁ ልቡ ሰባት ኢከረዩ እሉ፤

- መንባዬ፤ እንዴ ኢት ጸብጦ ዲብዬ፤ ሐዩት ሕነ ሚ ሐዜነ ምኖም፤ አነ ኖሰዬ እተ ቀደሙ እብዋር ሀሌኮ ማሚ፤ ለሸሕሩ ወለ ቦዛሁ ዲብዬ ልጀርቡ፤ ክም ሸንሀቱ - ለእለ ሐዘ ልውዲኒ - እት ሐን እራደቱ ለአቴኒ ወዲብ ሐለትዬመ ልትሰለዋ ሊበል ክም ምራዱ . .

እግል መደት ረዶም ትም በሐተት፤ ገሌ አግጸት ጸልመተ፤ ገሌሁ አግጸት ሀይ በርሀ ወእግል ዓሬ አኖከ፤ ወክልኢቶም ለጀማይዕ እሊ ጽኑዕ ቃይድ ሚ ገብእ እግል ትጀሬ እቱ ቱ እት ልብሎ እግለ ሸሐርታይ አትቃመተው፤

ህቱ ላተ ሰኒ ፋይግ ወርዩሕ እት እንቱ ወለ ናይ ደማንት ነፍሰ ተበሰም እተ ከፍፍሩ እት እንተ ረአርው፤ ለመልክ እብ ክርን

እተ ሰክራን ማን ወገለብ እት ለአሸክት ክመ ርሕ ለአለቡ እቱ እት መስል ዲብለ ኩርሲ ድብ ቤለ፤ ለዓፍየት ሀይ ናይ መትዐጃብ አክራን አስመዐው፤ አሟር “ሆርዳዴፍ ኩብዱ ሰበት በርደት ተበሰም ወደ፤ “ዲዲ” እብ እሕትራም አሰክ ፈርዑን እንዴ አቅመተ ከእብ አድብ ክም እለ ቤለዩ፤

- መንባዬ፤ አነ አዜ ክምስል ሐዘኮ ወእመርኮሁ ወህቱመ ቦታተን እግል ልእቤ እዬ ሐለት አለቡ ዲብ፤ ምናተ አነ አርት ምነ ዐባዩ ፍራሰ ዐድነ ላቱ ቃይድ ወፈታይ ወመለሀይ ፈርዑን ላቱ እናሰ እግል ሀይን ርሕዬ ኢትወድዩ እግልዬ፤ ከመንባዬ እሊ እሉ ርእያም ሀሌኩም ከፊኩም ማሚ? ፈዑን እብ ሙዋፈቀት ረአሱ ነክነከ፤

ለሸሐርታይ ሻፍግ እት እንቱ አሰክለ ሓለቱ አቅበሉ፤ ወእበ አጩብዕቱ እብ ምልሃሁ እተ ብሱቱ ጣሰሰዩ፤ ወእብ ክርን ድሀርት ቀደም እለ ሰምዓት ለኢኮን ተዕዋዛት ወደ፤ ለእናሰ

ምን ኬን ቁብ ለትደውር ስልጠት ሀይ ብክ ሚ ኢኮን?

ለእናሰ ሰኒ እጥምእኩን ወርሐ ዳምን እት እንቱ፤

- ሰኒ መንባዬ፤

ለመልክ እት ሰልፍ ተማም ሐሰበ፤ ወሚ ሰአል ክም ወጀህ ዲቡ ተማም ምስል ርሐ ትሻወረ፤ ወለ ገጹ እብ ኖር ህዳየት በርሀ ከእግለ ሳሕር ክም እለ ቤለዩ፤

- እሊ ዐርሽ ናይ መስር፤ ምን ዙርየትዬ ላቶም ምሉክ፤ አሰክ ምዶል ክም ልትገሰው እቱ እግል ተአሰእለኒ ትቀድር? ዲብ ልብል ትሰአለ፤

እተ ገጽለ እናሰ አሻይር መሻቅል ወፈርሀት ትረኣ፤ ፈርዑን እትለ ረአሰለ እናሰ ደውር ለሀለ ጋር ሰበት ኢተሐበዐ ምኑ ክም እለ ቤለ፤

ክምስል ሐዘክ እግል ትትሃጌ ሕርየት ሃይብክ ሀሌኩ፤ ወእበ እለ ትብል እግል ይአክዘክ ወይእሰአሰክ ገለድ አቱ እግልከ፤ አብሸርክ ሐቱ ኢትፍረህ፤

ለእናሰ ሀይ እግለ ገጽ መንባሁ ተማም ፈጥነዩ፤ ረአሱ አሰክ ሰመ እንዴ አንቀዕረረዩ ሄ ደዐ ወደ ወእግል መደት ረዶም ህግዩ ኢኮን ወሐረከት ኩሰኩሰ ሰአኩ፤ ከዶል ለአሰክለ መልክ ወለ ጸሩ ትወለባተ ለገጹ ጸልመተ ወለ ከፍፍሩ ትረማጠጠ ወለ ግንሐቱመ ሰኒ ሕይርት ዐለት፤ እተ ዶል ለሀይ አልባብል ቀም ፈርሀት ወርሰቱ ወሸር ድቁብ ለዐይሮም ክምሀለ ትዩቀነው፤ አሟር “ሪዕዮፍ” ሰብሩ ሰበት ትከለስ ክምእለ ቤለ፤

ሚ ጀሬት እትክ አፎ ኢትትሃጌ፤ ፈርዑን ምንለ ገብአት ትግበእ ብቀት ገለድ አተ እግልክ ማሚ?

ለእናሰ ለለሀልክብ ዐለ ትንፋሱ እንዴ ሐበዐ፤ እግለ መልክ ክም እለ ቤለዩ፤

መንባዬ፤ ዐርሽ መስር ግድም ሐቀክ ምን ዙርየትክ ላቱ አርትመ እግል ልትገሰ ዲቡ ኢኮን!

እለ ዘዐቱ ክመ እተ አመተ ኢተአመረት ሰረፍሪፈት እግለ ፋይግ ለዐለ ድዋራት ፈነዋር ለትወድዩ ለአልባብ ሻተፈት ምኖም፤ ወኩሎም እበ ክም ምድጋለ እሳት ለፈዳቢት ለሰረር ልትናፈር ምኑ ለመስል ዕንታቶም አሰኩ አፋዘዘው፤ ፈርዑንመ ትቀጸበ ወለ ገጹ ገጽ ሐዩት እብ ሐሩቀት ዋሕር መስለ፤ ገጽ አሟር “ሪዕዮፍ” መ ሕመት ጸላም ገልበቱ ወለ ከፍፍሩ ዲብ አሕድ ሰበት ለዋኦ ለሓለቱ እምበል ሸር ወሀላክ ሐቱመ ተአሰእል ይዐለት፤

ለሳሕር ምነ ጀረ ሀላግ እግል ለአትሻጅዕ ሰበት ሐዘ ክምእለ ቤለ፤

ምናተ መንባዬ ላቱ እብ ሰላም ወዓፍየት አሰክ ደንገበ እሊ ዋዉል ወልዉቅ ዕምርኩም እግል ትሕከሞ ቱ፤

ዲብ ገጽ 8 ልተላሌ...

ጥዑምገቢ ተሰፋይ

ዐመልየት ፈንቅል እት ሐንቲ፡ “ፈንቅል፡ ገለድ ሕጡዋ!” ለትብል ስቅራት እግል 33 ሰነተ እት ለትዐየደት እቲ እብ ሀይአት ሐብሬ ወተዕቢኣት ውዛረት ድፈዕ ለትቀደመ በራምጅ እግለ ቃልየት አምዕል ዝያድ ነያረት ምነ ለሀበ ጽበዋ ጋብእ አስመኑ።

ርኢስ ኢሳይያስ አፈወርቂ፡ እብ መናሰበት ዝክረት 33ይት ኢነት ዐመልየት ፈንቅል፡ ዲብ ተምሳል ሹሀደ ጥዋለት ዕምቦብ ከረ።

እምበል እሊ ሰካን መዲነት ባዴዕ፡ እብ መናሰበት ዝክረት 33ይት ኢነት ዐመልየት ፈንቅል፡ ዮም ሰምበት ዐባይ 12 ፈብሩዋሪ ዳሳት መዐየ እንደኣዳለው ምን ሰር ምዕል ጋሻሆም ተሓደረው።

እብ ሀይአት ሐብሬ ወተዕቢኣት ውዛረት ድፈዕ ዝክረት ዐመልየት ፈንቅል እግል ነወሮት ምነ ለትዳለ በራምጅ፡ ጅግረ ሾሊቦል ግንራራብ በሐር፡ እት ፍንጌ ሴዕ ፍረቅ ውላድ ወሰማን ፈረቅ አዋልድ፡ ጅግረ ሐንበሶት ህይ እት ፍንጌ 9 ፍረቅ ውላድ ወአዋልድ፡ ዕፌ ታሪክ መ ሸክል ወረሰም፡ ክምሰልሁመ ሰዐይ ሕበር (Mass sport) እብ መናሰበት እድንያይት አምዕል ርያደት ዐሳክር ለሸምልቲ ለዐለ።

ክቡድ ተሐድያት እንዴ ተዐደ፡ አርወሕ እንዴ ደፍዐ እግል እሊ ዐመልየት ለሐቀቀ ንዳል ኤራትርየ ለአሳሱ ቅዋት ድፈዕ ኤራትርየ፡ እሊ አምዕል እሊ እግል ለአግምል ወዲብ አጅያል እግል ለዐድዮ፡ እት ክል ሰነት ለልትነዝም ለትፈናተ በራምጅ ልትቀደም ጸንሐ። ዮም ዓመት ህይ፡ ክምለ እት በዲሩ ታሪክ ለከሰስ ወለልኣትፋግዕ ጽበዋ እበ ለትነዝመት ገበይ እግል ዕፌ እብ ቀደሞት ምን መትፈርጀቲ ሐምዴ ዛይደት እግል ልርኩብ ቀድረ።

ዎሮ ምን በራምጃቲ ህይ፡ ዲብ ዮም 10 ፌብሩዋሪ መዋመጦርለ ዲበ አምዕል ለገብእ ውላድ ወአዋልድ ለልኣሻርክ ኤራትርየን አትሌታት ሰዐይ ዐውቲ ሰር-መራቶን ምፍጋር ጸሓይ አፍሪቀ ሰነት 2023፡ እብ ሀይአት ሐብሬ ወተዕቢኣት ውዛረት ድፈዕ ለትነዝመ ሰዐይ ሕበር (Mass sport)መ ገብእ። እሊ “መሰንዮት እብ ርያደት” ምነ ትብል ንዮት ለትበገሰ ሰዐይ ብዝሓም፡ ምን ጥዋሎት እንዴ ቀንጹ፡ ዲብ ሲነመት አይደ ተመ። እትሊ ጅግረ ዎሮ ናዕ ፈላይን ለላብሳም፡ ገሌ ህይ ልባስ ዐስከከርየት ዴሽ ኤራትርየ ለለብሰው ዝያድ 300 ነፈር ምን ቅዋት ድፈዕ ሻረከው ዲበ።

እምበል እሊመ፡ ዲብ ሳቦታት አዳሕየት እግለ እብ ረሳሚን አንፋር ቅዋት ድፈዕ ለትዳለ ዕፌ ረሰም ወአሸክል እብ ቃይድ ቅዋት በሐር ኤራትርየ ሚጀር ጀነራል ሐመድ አሕመድ ካሪካሬ፡ እብ እዳርዩን፡ ቅያደት ዴሽ ወመስኡሊን ጀ.ሸ.ዲ.ዐ እንዴ ተለ ክም ከሰተዮ፡ እት ልትደዋወር ትፈረጀው። እትሊ ናይ ዮም ዓመት ዕፌ ዲብ ሰነት 1975 ዲብ ወኪድቡ መቅበረት እንዳማርያም-ገጃረት፡ ዝባን ሰንቀይ፡ ድርፎ፡ ዐዲ በጃኮይ፡ ክምሰልሁመ እብ ዔማይ ዴሽ አቶብዩ ዲብ ለትፈናተ አካናት አስመሪ ውበዕድ ድዋራት ለገብእ ጀራይም

ለሸራሕ፡ ሐያት ወመትደቃብ ንዳል፡ ውሕደት ሸዑብ ወሙናድሊን ለገልህ ጽበዋ ዐለ እቲ።

እብ ፍንቲይ፡ ለዲብ ሰነት 1975 ለዐለ አዋይን ለሸራሕ፡ ልብ መትፈርጀት ለሰልቡ፡ ወግረ እንዴ አቅበለ ጀራይም እስትዕማር ለልኣትፋቅድ ክም ዐለ ምን ረአይ መትፈርጀት እግል ልትወደሕ ቀድረ። ዕፌ አሸክል ወሰወር ሀይአት ሐብሬ ወተዕቢኣት ውዛረት ድፈዕ እግል ሰለሰ አምዕል እት ለጸንሐ እቲ ወክድ ሸዑብ ሰኒ ብዞሕ ዐፈዩ።

ለእብ ሓክመት አቅሊም ቅ/በ/ቀየሕ አሰይደ አስመሪት አብርሀ ለትከሰ ጅግረ ሾሊቦል ለዋው በሐር ቅዋት ድፈዕ ህይ፡ እግል መደት ሐምስ ምዕል ዲብ ገርጉሰም ገብእ። ሐቅ ናይ አርበዕ አምዕል (Double Elimination) ጅግረ ዲብ ደንጎበ እግል ካስ ለተልሀዩ ምን ፍረቅ አዋልድ ሐሬነ ወሰንዋቅ ተን። እትሊ እግል ሓምሳይት ሰነቲ ገብእ ለሀለ ጅግረ አርበዕ ወክድ ፈረቅ ሐሬነ ልትዐወት እት ሀሌ፡ ሐቲ ዶል ህይ ዐንበርብ ክም ተዐወተ ስጅላት ናይለ ጅግረ ለአክድ። እትሊ ናይ ደንጎበ ጅግረ ሐሬነ እግል ሓምሳይ ዶሉ እግል ልትዐወት ወሰንዋቅ ህይ እግል ሰልፍ ኢነቲ ካስ እግል ልርኩብ ለወደወ መጃገረት እግል መትፈርጀት ለረይሐ ዐለ። ዲብ ደንጎበ ሰንዋቅ እግል ሐሬነ እንዴ ቀልበ ሻምፕዮን ሾሊቦል ግንራራብ በሐር ቅዋት ድፈዕ ሰነት 2023 ገብእ። ካልኣይ ህይ ፈረቅ ሐሬነ ወሳልሳይ ፈረቅ ሳወ ተዐወተው።

ጅግረ ሾሊቦል ግንራራብ በሐር ውላድ እብ ውቁል ተእዩድ መትፈርጀት ለተለ ዐለ። ምን ዶል ዲብ ዶል መጃገረቲ እንዴ ቀልብ ለመጽአ ወዲብ ካስ ለበጽሐ ፍረቅ ሳወ ወሐሬና ቲ ዲብ ደንጎበ ለትዋጀህ። እትሊ ትሩድ ጅግረ ፈረቅ ሐሬነ እግል ፈረቅ ሳወ እንዴ ቀልበ ሻምፕዮን ሾሊቦል ግንራራብ በሐር ቅዋት ድፈዕ ኤራትርየ ሰነት 2023 እግል ልግበእ ቀድረ። ፈረቅ ሳወ ካልኣይ ወፊሪቅ ዐንበርብ ህይ ሳልሳይ ገአው።

ጅግረ ሕማሴ ቅዋት ድፈዕመ፡ ዎሮት ምነ እግል ዝክረት ፈንቅል ለነወረ በራምጅ ርያደት ቲ። ብዝሓም አንፋር ቅዋት ድፈዕ ወሰነን መዲነት በጽዕ ትፈረጀው። ለዲብ ባካት ረአሰ ምድር ለገብእ ጅግረ ሕማሴ፡ እግል መትጃገረት ለአምተሐነ ወመጃገረት ትርድት ለትርኤት ዲቡ እት ገብእ፡ እት ናይ 50 ምትር ሐመሶት ምን አዋልድ አወላይት ሚለን ሀይሌማርያም ምን ፈረቅ ዐንበርብ፡ ካልኣይት ትዕግስቲ በላይ ምን ፈረቅ ሳወ ወሳልሳይት ራሀወ ሀብቶም ምን ፈረቅ ሸዑለ ተዐወተዮ።

ዲብ ናይ 100 ምትር አዋልድ አወላይት ክርስቲና ታደሴ ምን ፈረቅ በኒፈር፡ ካልኣይት ዮሃን ተሰፋይ ምን ፈረቅ ሰንዋቅ ወሳልሳይት ርግኣት ተ/ማርያም ምን ፈረቅ ሓሬነ ልትዐወተ እት ሀለዩ፡ ዲብ ከሀላት አዋልድ አወላይት ሳሮን ተክለኣብ ምን ፈረቅ ዐንበርብ፡ ካልኣይት እንትሳር ሰዲድ ምን ፈረቅ ብድሆ ወሳልሳይት ሳምራዊት ሐለፎም ምን ፈረቅ ሸዑለ

ተዐወተዮ።

ጅግረ ሕማሴ እግል ታሴዕ ሰነቲ ገብእ ለሀለ እት እንቲ፡ ዲብ 100 ምትር አወላይ መሕሙድ ዩሰፍ ምን ፈረቅ መኸቲ፡ ካልኣይ ሳሙኤል ተሰፋ ምን ፈረቅ ሓሬነ ወሳልሳይ ኤሽን ገብረሂወት ምን ፈረቅ በኒፈር እግል መጃገረቶም እንዴ ቀልበው ተዐወተው። ዲብ 200 ምትር ውላድ አወላይ ተመስገን ዮውሃንስ ምን ፈረቅ መኸቲ፡ ካልኣይ ዜናዊ ተክልኣብ ምን ፈረቅ ብድሆ ወሳልሳል እዝረ ናትናኤል ምን ፈረቅ ሰንዋቅ ገብአው።

ከሀላት-ሕማሴ ውላድ አወላይ አማን ደባስ ምን ፈረቅ ብድሆ፡ ካልኣይ ሲራክ ወልደሚካኤል ምን ፈረቅ መኸቲ ወሳልሳይ ጀማል አዳል ምን ፈረቅ በኒፈር ዕዉታም እንዴ ገብአው አትመመው።

እብ ፈረቅ ደረጀት ንቀጥ እንዴ

አተላላይ መቃበለት ርኢስ ኢሰያሰ....

ምን ገጽ 7 ለተላላ

እሊ ጀሪመት ቲ። ሀደፍ ለአለቡ ሐርብ እንዴ አወጀክ ወራር እግለ ኢክሰሱ መስኪና ሸዑብ ዲብ ተአፈኔ እት ብቅት እንዴ ከሬክ እለ ክለ ከሳር ወበክት ደንጎሳሁ እግል በዳክ ዲብ ገብእ ለትትሰኣሉ አዳም ኢሀለ። ምኑ ተሀርብ ወመሰምስ ትከልቅ። ክእነ ቀጭፈው ወክእነ ዘምተው፡ ክእነ ለልትበሀል ኢሀለ። አምዕል ሐቲ ሰኣል እግል ለሀሌቡ። ክእነ ላቲ ህንዲድ ሰሳለ ሰነት እብ ግዲደን ሸዑብ አቶብዩ እብ ቅምያት ወቀባይል እንዴ ፈንጠርክ ደማር ለሰቡበክ እቲ። እሊ በሀለለት ኢኮን። ዲብ እለ መንጠቀት ለትከለቀ አዋይን ቀሊል ኢኮን። እሊ ማሌ ቅሩብ እብ ሰለሰ ደውራት ለገብእ ደማር እብ ሚ እግል ተአመሰምስ እቡ ትቀድር፤

አዜ ኣነ እግል ኢበለ ለእቀድር፡ እግልሚቲ ሐርብ ለአትሐዘዩ እግልሚቲ አክል እሊ ደማር ወፊነ ጀሪ፤ እብ እሱዋ ሲያሰት ቲ ዲብ ሐርብ ለአተው፤ ለናይ ደንጎበ ሀደፍ ናይ እሊ ሐርብ ሚቲ፤ ሚ እግል ልብጸሐ ሰበት ሐዘውቲ ዲብ ክእነ ላቲ ሐርብ ለትሸመመው፤ ናይለ ለአገቡሮም መናቢቶም ዲብ እለ መንጠቀት ለሀለ እሎም ኤታን እት ፍዕል እግል ለውዕሎ ለወደወ ቲ። ለአጃንደት ኢትብደለት፡ ንዘም ዋሽንግቶን እብሊ ዲብ እለ መንጠቀት ለሀለ አዋይን ፋሬሕ ኢኮን። ሰበት እሊ፡ ዲመ መታክል ወመሻክል እግል ልክለቅ ሀለ እሊ። ክምሰል ክራም ወያኔ ምን ረክብ ሰኒ ወሀቲ ኢትረከበ ምንገብእ ወያኔ ለመሰል ብዕድ ልኡክ እግል ለአምጸኦ ስም። አዜመ ምንገብእ እብሊ ለልትከሰብ ምንመ ኢሀለ፡ ልሰዕ ለናይ እዲነ ሸቀላት ወመሻክል ዲብ ዘይድ መጽእ ሀለ። እለ ማሌ ለጀራት ደማር ቀላል ኢኮን፡ ክእነ ላቲ ደማር ዶል ትመጽእ እግል ነኣብዋሪ ሌጠ ብዝ።

እሊ ሰለሰ ህንዲድታት ወዲበ ሐልፈ ሰሳለ ሰነት ለትረኣ ቴለል እንዴ ትቤ እግል ትትሃጌቡ ትቀድር። እሎም አፍካሮም ዲብ ፕራቶርየ ወናይሮቢ



አክእለለው ምን ፍረቅ ውላድ ፈረቅ መኸቲ ተዐወተ። ደርቡ ህይ ፍረቅ ብድሆ ወበኒፈር ገአው። እብ ደረጀት ፈረቅ አዋልድ ህይ እብ ዕመማይ ኑቅጠት አወላይ ፈርቅ ዓንበርብ፡ ካልኣይ ፈረቅ በኒፈር ወሳልሳይ ፈረቅ ሰንዋቅ እንዴ ገብአው ጅግራሆም አትመመው። እብ ፈረቅ ልግበእ ወእብ አፍራድ እግለ ተዐወተው

መትጃግረት ህይ ምን ለትፈናተው መስኡሊን ዴሽ ለትዳለ እግሎም ጀዋእዝ ማል ወካሳት ትከበተው።


እግል ዝክረት ዐመልየት ፈንቅል እብ ሀይአት ሐብሬ ወተዕቢኣት ውዛረት ድፈዕ ለገብእ በራምጅ ወመዳሊቲ ህይ፡ 33ይት ዝክረት ፈንቅል-2023 እብ ነያረት ክም ተምም ለወደ ወቀይ ዐለ።

ለገብእ እትፋቅያት እብ ፍዕል እንዴ ተርጀመዉ እንዴ ሰክበው እግል ልትመዋውቲ ወለ ብዕድ ስታቲባት ስም። እሎም የምክን ምኑ ለሀርቦ ገበኤ ላኪን ክእነ ለትመሰል ካልኣይት ትልህዩ ዲብ ትግራይ እግል ልተልሀው በክት አለቦም። ቀደም እላመ ኢዐለ፡ ለትፈናተ አሰባብ ወመሰምስ ዲብ ለአመጸኦ ዶል ናይ ምክሑ፡ ዶል ብዕድ ዋይዲባት ዲብ ከልቀ የምክን ሸቄ ገብእ። እሊ ናይ ደንጎበ ማሌ ለገብእ ላኪን ድራሰት ዐባይ ቲ። ድራሰት ዐባይ እምብል ዲብ ህሌነ ለእብ ቀሰብ እበ ኢክሰሱ ሃባት ለትቃመደ ሸዑብ ትግራይ ወለሳደፈት ደማር ወከሳር ምስለ ገብእ እግል ተአትጃግሩ ኢትቀድር። እለ ከሳር እለ መስኡልየተ እግል ልረፈሆ ስም። ሕናመ እሊ ለጀሪ እግል ንጌምም ገብኣነ ምንገብእ ለአሕዳስ እብ ደረጀት ደረጀት እግል ንርኣዩ ብዝ። እሊ ድድነ ለገብእ ከይናት ብዙሐቲ፡ ሐሬ 80 ሰነት ክእነ እግል ሊደውነ ኢልትሐለሎ፤ እግልሚቲ እት ረኣሰነ ሐርብ ለለዐልዮ፤ ሕነ እብ ሰላም እግል ንንበር ኢልትሰመሕ እግል፤ ሕነ ምኖም ለእንጠልቡ ጠለብ አለብዝ። ላኪን ክምሰል ክሉ ሐቅ ብዝ። ኤራትርየ እግል ስትራተጅያይ መሳልሕነ ኢትከድም ዲብ ልብሎ ለለትዐግቡነ እግልሚቲ፤ ወእግልሚቲ ምነ ሳድፎም ፈሸል ለኢመሸጎ ወኢደርሶ፤ አፍካሮም ወሄራሮም እግል ልበድሎ ኢቀድር፤ ሐርብ ብሩድ አክተመ፡ እብ ዓመት ዲበ ቴለል ምን ነአቀብል እትሊ ሰለሰ ጀርቤታት እብ ናይነ ረኣይ ሐርብ ተመ። ላኪን ለጠፈሽ ደላል ምን ገብእ እዩ እንዴ ቤለ ዲመ ጀርብ። ሕነ ላኪን እበ ትትቀደረነ አፍሸልናሁ። አዜመ ምንገብእ ግሪ እለ ደማን ብነ እንዴ እምቤ እግል ንትሀመል ይእንቀድር።

እብ ዓመት ላኪን እሊ ሰለሰ ጀርቤታት ዐቢ ተጃርብ ወድራሰት ርክብት ምኑ ክምሰል ህሌት እግል ንጌምም እንቀድር። እሊ ህይ ሕነ ምስል ፈደራል ጄሽ እብ ሕበር ሰበት ሸቄነ እቲ ወለረከብናሁ ተጃርብ

ሐድ ኢኮን። ላኪን ፍንጌ ኤራትርየ ወአቶብዩ ሰላም እግል ትምጸእ እግሎም ሕማም ጨዳቂት ሰበት ገብእ እሊመ ሰኮብ ክምሰል ከለኣም ወእግሉ እግል ለሐምርጎ ክምሰል ልትጸገሞ ሸክ አለቡ። እብ ከኣፎ ኤራትርየ ወአቶብዩ ተአትብእሱ፡ እሊ ህይ ዲበ መንጠቀት ሶማል ሱዳን ግብለት ሱዳን እግል ለተሐምርግ እቡ ቴለል እግል ልክለቀ እንዴ ኢሰክቦ ክምሰል ልትመዋው እሙርቲ። እብ ሰብብ እሊ ዋይዲባት እሊ ዲብ እለ መንጠቀት ወእብ ፍንቲይ ዲበ ለሐልፈዩ 80 ሰነት ፍንጌ ኤራትርየ ወአቶብዩ ለዐለ ቴለል ወእሊ ማሌ ለሀረሰው ሰለሰ ህንዲድታት ወለሳደፈት ደማር ወከሳር እብ ቀሊል ለትትረኤ ኢኮን። ሰበት እሊ፡ ምን እሊ ሰለሰ ወራራት ሚ ደረሰነ፤ ተፋሲል ናይለ ገብእ አሕዳስ እብ ሐት ሐቲ እግል ልትረኤ ቀድር። እሊ ተጃርብ ዐቢቲ ድራሰት ህይ ክሰብት ምኑ ህሌት። እብ ጀሀትነ እሊ ሳልሳይ ወራር አው ህንዲድ ወያኔ አክተመ። ለዐበ ተጃርብ ለትከሰበ ምኑቲ። ለጀራት ደማር ህይ እብ ዐሰሮታት አላፍ እንዴ እንገብእ እብ አምአት አላፍ ዐለት እግል ትትበሀል ትቀድር። ሕነ ህይ ዲብ እሊ ሰለሰ ወራራት ለዐለ እግልነ ዶር ሌጠ እንዴ ኢገብእ ዲብ እለ መንጠቀት ሰላም ወመስኩብት እግል ልትመደዳ ለትጸገምናሁ ቀሊል ኢኮን። እሊ ለእንወድዩ ጸገም እግል ሐምረጎት ለገብእ ዋይዲባትመ እተ ክምሰልህ ዐቢ ቲ።

ምን እሊ እንዴ ትበገሰነ ስሙድነ ወመዳሪዕትነ ዲብ ኤራትርየ ወአቶብዩ እንዴ ኢልትሐደድ እትለ መንጠቀት እግል ልፍዩሕ ወልዕቤ ቡ። ክእነ ለመሰል ካልእ ዶል ህንዲድ እግል ኢልምጸእ እብ ጀሀትነ እግል ንትዳሌ እግሉ ብዝ። ህቶም ምዶል ስልሐም ከሩ ወምዶል ዲብ መዓሳክር ለአቲ ኢኮን ለሰኣል። ዲመ ምኖም ወምነ ለአገቡሮም መትደጋግ ለትሐዘ። ዲበ ዐለ ቴለል ተዐወትነ ወምኑ ተጃርብ ብዙሕ ከሰብነ ሌጠ እንዴ እምቤ ለንትግሴ እንዴ ኢእንገብእ፡ ዕላቀትነ እግል ንጠውር ወመዓወትነ እግል ነፃቤ ላዘምቲ።



ኤሪትራይ፡ ሻምፕዮን ብድረ ዐጃላት አፍሪቃ 2023 ነስኦት



ኤሪትራይ እት ዲብ ጋና እግል 19ይት ኢነቱ ገብእ ለአስመን ሻምፕዮን ብድረ ዐጃላት አፍሪቃ አወላይት ፈግረት። ኤሪትራይ እብ ፈሪቅ ውላድ እት ሻምፕዮን ብድረ ዐጃላት አፍሪቃ ለሻረከት እት ገብእ፡ እብ ሄኖክ ሙሉኦብርሃን ተ ለትወወት። ደግሞም ኤሪትራይ ሻምፕዮን አፍሪቃ እብ ሄኖክ ሙሉኦብርሃን ናስኦት ተ።

ኤሪትራይ ምን እንበትተለ ጅግረ አወላይት እግል ትፍገር ትትስኤ ዐለት። ሰበቡ ህዬ፡ ምን ሰነት 2010 ወሐር እት ህለ ሰኖታት፡ ሰለሰ ሰነት ሌጠ ግብለት አፍሪቃ ለበድረት ኤሪትራይ፡ ሰማን ሰነት ደርብ ሕድ ሻምፕዮን ጅግረ ዐጃላት አፍሪቃ ለነስኦት ደውለት

ሰበት ተ፡ ለትወቀለት አነን ህይብት ዐለት።

ኤሪትራይ እሊ ሻምፕዮን ዐጃላት አፍሪቃ፡ እት ሰነት 2010፡ 2011፡ 2012፡2013፡ 2015፡ 2016፡ 2017፡ 2018፡ 2019 ወ2022 ዕውትት ዲቡ ተ። እምበል እሊም እት ናይ ብሕቶት ናይ ወቅት ጅግረ፡ ሄኖክ ሙሉኦብርሃን ሳልሳይ ደረጃት እት ረክቡ፡ አክሊሉ አረፋይኔ ናይ ምተሐት 23 ሰነት መዳልየት ወርቅ ረክቡ።

እት ማሌ-ለህ ለገብለት ካቲመትለ ጅግረ፡ ናትናኤል ብርሃኔ ወሚሮን ተሾሚ ዋልወ ለዐለው ጅግረ፡ እግል ሄኖክ ሙሉኦብርሃን አርደት አጣፍሐው እሊ።

ዩኤል ሀብትኣብ፡ አክሊሉ አረፋይኔ፡ ሚልኪያስ ቅዱሴ ኤፍሬም ገብራሂወት ወናሆም ዘርኣይመ እት ሾላት እግል ዐውቲ ፈሪቅም ለከድመው እት ገብእ፡ ሄኖክ ሙሉኦብርሃን እግል መትጃግረቱ እንዴ ሐልፈ ከዋ ነሃየት ለኬደ ዐለ።

ወእብሊ ሄኖክ፡ ምስል ናይ ደግሞ ክልኤ ዶል ደርብ ሕድ ሻምፕዮን ዐጃላት አፍሪቃ ለነስኦት፡ ምስል ናይ 2011 ወ2012 ደርብ ሕድ ሻምፕዮን ዐጃላት አፍሪቃ ለነስኦት ናትናኤል ብርሃኔ ሰው ጋብእ ህለ።

እት ምንተሐት 23 ሰነት ዓማር ህዬ አክሊሉ አረፋይኔ 2ይ ደረጃት ረክቡ። ሰበት እሊ፡ ኤሪትራይ ደግሞ ዲብ ሸርም-አሼኽ መስር ለረክቡ፡ ዐውቲ፡ ዮም ዓመት 2023 እት አክራ-ጋና ዳግመቱ ህለት።

ኤሪትራይ እስልፍ እት ሰነት 2010 እብ ዳንኤል ተኽሌሃይማኖት ዕውትት ሻምፕዮን ዐጃላት አፍሪቃ ገኣት፡ ደርብም እት ሰነት 2011 ወ2012 እብ ናትናኤል ብርሃኔ ሻምፕዮን ትሰርጌት። እብሊ ለኢትከረዐት ኤሪትራይ፡ እት ሰነት 2013 ወ2016 ዝያድ ኩለን ድወል አፍሪቃ ለአሸነዩ ሻምፕዮን ዐጃላት አፍሪቃ እብ መትኩብታይ እማነት ተስፎም ዑቅማርያም ነስኦት።

እምበልሁመ፡ እት ሰነት 2017 ሌጠ እብ ግብለት አፍሪቃ ለትበደረ ሕሩይ ፈሪቅ ዐጃላት ኤሪትራይ፡ እት ሰነት 2018 ወ2019 ደርብ-ሕድ እብ አማኑኤል ገብራእግዚኣብሄር ወመክሰብ ደበሳይ ሻምፕዮን አፍሪቃ ናስኦት ተ።

አዚመ ደግሞ 2022 ወዮም ዓመት 2023 ደርብ ሕድ ሻምፕዮን ጅግረ ዐጃላት አፍሪቃ ረክቡት ወጅቡት ሐበን ለብሰት። እብ ክልኢትን ደግሞ ወዮም ዓመት ሄኖክ ሙሉኦብርሃን ቱ ኤሪትራይ፡ ሻምፕዮን አፍሪቃ እት ዐጃላት ለረክቡት እቡ።



ሻምፕዮን ሰር-ማራቶን ምፍጋር ጸሓይ አፍሪቃ ተ'መ

24ይ ሻምፕዮን ሰር-ማራቶን ምፍጋር ጸሓይ አፍሪቃ፡ እት 10 ፌብሩዋሪ 2023 እብ ናይረት ዐውቲ አትሌታት ኤሪትራይ እት መዲነት ባጽዕ ተመ።

እብ ክልኢቶም ውላድ ወአዋልድ ለትክመ ጅግረ፡ ሰልፍ እብ ናይ አዋልድ አንበተ። ለጅግረ ምን ሰልፍ፡ እብ አለምፕያይት አትሌት ናዝሬት ወልዱ ትዋለ።

አለምፕያይት ናዝሬት ደግሞ እሊ ጅግረ እብ 74:00 ደቂቀት እትምምቱ ሰበት ዐለት። ዮም ዓመት እብ ምንተሐት 70 ደቂቀት እግል ተኣትምሙ ተ ለትዳሌት። ሐዲስ ረቅም ቅያሲ እግል ትርኩብ ትሰኔ ለዐለት ናዝሬት 15 ኪሎምትር ክም ሰኔት፡ እት ረሐተ ገሌ ሰር ትጸበ። ወሸፋገብ አንቀስት፡ እግል ጅግረ ህዬ እብ 1:14:12 እምበል መትጃግራይት አትመመቱ። ወእብሊ



ለናይ ደግሞ ሕሸመት ዮም ዓመትመ ሕዋዋት ህለት።

ናዝሬት 45 አልፍ ነቅፈ፡ መዳልየት ደሀብ ወክሰ ዐቢ ትሰርጌት። ናይ ፈሪቅ ግብለት አትሌት ሮግቤ ወልዱ 2ይት፡ 30 አልፍ ነቅፈ ወመዳልየት ወርቅ ረክቡት። 3ይት ህዬ ምን ፈሪቅ ደንደን (ውዛረት ድፈዕ)አትሌት ንጽሃ ንጉሴ 22,500

ነቅፈ ወመዳልየት ነሓስ ተዐወትት። ናይ ደንደን መዝት ተሰፋ 15 አልፍ ነቅፈ፡ ናይ ግብለት አትሌት መርሃዊት ወልዳይ 11,250 ነቅፈ፡ ናይ ደንደን አትሌት ዮርዳኖስ ሀብቲሰላሴ 7,500 ነቅፈ ምን ራብዳይ አስከ ሳድሳይ ተርቲብ ከሰበ።

ለናይ ውላድ ሰይሴ ሰር መራቶን፡ ምን ኬንዩ፡ አቶብ፡ ታንዛንዩ፡ ወኡጋንዳ ለመጽሐው መትብድረት ሰበት ዐለው ዲቡ፡ ምን ሰልፍ ድቁብ ዐለ። ምናተ ሻምፕዮን ሰር መራቶን 2021 ለናስኦት አትሌት ብርሃኔ ጸጋይ እት መርሐም ትረኣ።

መጅመብት ሚርሓይት ውላድ ኬንዩ ወአቶብ፡ ሰበት ዐለው ዲቡ፡ እግል ኤሪትራይን አትሌታት ለልክሰክብ ጋር ይዐለ። ወድ ኬንዩ መተቲ ዳንኤል፡ እቶብ በላይ ዋላሁን ወኡጋንዳ ሊዮናርድ ቼመንጎስ ምን መሬሕ ለዐለ ኤርትራ አትሌት ብርሃኔ አፍወርቂ ፍንቱያም ሰበት ይዐለው፡ ለጅግረ ሰኔ ትደቀቡ።

አትሌት ዮውሀንስ ሀብቲገርጌ፡ እትሊ ናይ ዮም ዓመት ሰር መራቶን 33ይት ሰነት ዝክረት ፈንቅል አወላይ ዲብ ልትወት፡ ደርብ አትሌት ብርሃኔ አፍወርቂ 2ይ ሰበት አቲ፡ ዐውቲ ሻምፕዮን ሰር መራቶን ፈንቅል ኤሪትራይ እብ ኤሪትራይን ትበሐተ። ወድ ኬንዩ

መተቲ ዳንኤል ህዬ 3ይ ፈግረ። ደርብ ኤሪትራይን አትሌታት ፊልሞን አብረሃ፡ ፔትሮ ማሞ ወዑቅባይ ጸጋይ ምን ራብዳይ አስከ 6ይ አተው። ክምለ ናይ አዋልድ ለዐለ ጀዋእዝ ህዬ፡ ምን 45 አልፍ ነቅፈ አስከ 7,500 ነቅፈ ጀዋእዝ ጃቀፈው።

ፕሪመርኪግ ዲብ 23ይት ሳምንቱ

ፍረቅ እንግሊዝ -ፕሪመርኪግ እት ሐልፊ ሰነትመ፡ ናይ ኮበራት እግር ጅግራታቱ እትሉሉይ እሰንቡት ተ።

ፋልሃም እግል ኖቲንግሃም ፎሬስት 2-0፡ ሌሴስተር ሲቲ እግል ቶቲንግሃም 4-1፡ ወዎልቭስ እግል ሳውዝዝምፕተን 2-1 እት ቀሉሳም፡ ዌስትሃም ወፎልሲ 1-1፡ አርሰናል ወብራንትፎርድ 1-1፡ ወክሪስታል ፓላስ ወብራይቶንመ 1-1 ትፈናተው።

ማንቼስተር ሲቲ እግል አሰቶንሺለ 3-1፡ ሊቨርፑል እግል ኤቨርቶን 2-0፡ ማንቼስተር ዩናይትድ እግል ሊድስ ዩናይትድ 2-0 ዲብ ቀሉሳም፡ ቦርንግሙዝ ወኒውካሰል 1-1 ትፈናተው። ወእብሊ ሰብረት ንቀዋ 10 ሰልፋያም ፍረቅለ ሊግ እሊ ተሌ ተ።

1, አርሰናል	= 51 ንቅጠት	6, ብራይቶን	= 35 ንቅጠት
2, ማንሲቲ	= 48 ንቅጠት	7, ፋልሃም	= 35 ንቅጠት
3, ማንቼስተር	= 46 ንቅጠት	8, ብራንትፎርድ	= 34 ንቅጠት
4, ኒውካሰል	= 41 ንቅጠት	9, ሊቨርፑል	= 32 ንቅጠት
5, ቶቲንግሃም	= 39 ንቅጠት	10, ዌልሲ	= 31 ንቅጠት



ዝክረት ዐመልዮት ፈንቅል እብ ሰወር

